


松江府志



漢書門				
二	三	五	三	類
四	一	函	號	
冊	架			

內閣文庫				
九	三	五	三	漢
函	二	四	冊	書
七	冊	架	號	類

四十五之八

廿二

內閣文庫	
番號	漢 2353
冊數	24 (22)
函號	292 17




A 1 2 3 4 5 6 M 8 9 10 11 12 13 14 15 B 17 18 19

Kodak Gray Scale



© Kodak, 2007 TM: Kodak





松江府志卷之四十五

隱逸

松郡泉石清麗又僻在海壤其地益多隱君子焉上者

絕情圭組抱道江湖次亦潔身修行皎皎著丘園之素

類非托跡終南以炫也故得采其遺行金列于篇

淺草文庫

日山絕情圭類非托跡終南以炫也故得采其遺行金列于篇

張翰字季鷹吳郡吳人也父儼吳大鴻臚翰有清才善屬

文而縱任不拘時人號為江東步兵會稽賀循赴命入洛

經吳閭門于船中彈琴翰初不相識乃就循言譚便大相

欽悅問循知其入洛翰曰吾亦有事北京便同載即去而

不告家人齊王罔辟爲大司馬東曹掾罔時執權翰謂同郡顧榮曰天下紛紛禍難未已有四海之名者求退良難吾本山林間人無望於時子善以明防前以智慮後榮執手愴然曰吾亦與子採南山蕨飲三江水耳翰因見秋風起乃思吳中菰菜蓴羹鱸魚膾曰人生貴得適志何能羈宦數千里以要名爵乎遂命駕而歸著首丘賦文多不載俄而罔敗人皆謂之見機然府以其輒去除吏名翰任心自適不求當世或謂之曰卿乃可縱適一時獨不爲身後名邪答曰使我有身後名不如卽時一杯酒時人貴其曠達性至孝遭母憂哀毀過禮年五十七卒其文筆數十篇

行于世

唐

顧謙字自修其先吳郡人風神朗秀質性端敏舉明經三禮二科洞達貫穿魏帥何公表讓高才拜貝州宗城令棄歸隱北平鄉崧子里名流高其風操成就見焉咸通十三年卒

宋

李行中字無悔高尚不仕隱居青龍江上治園圃築亭寄傲東坡顏之曰醉眠歌以贈之屬而和者蘇子由秦少游張子野輩十五人侈爲勝事

李智遠華亭人自號谷隱野人居頤浩寺竟日掩關澄心
默坐若槁木然元兵至不去兵擒之不驚及縱之亦不喜
事定月餘忽沐浴冠裳斂身危坐手詩云四十三年處世
中夢中成夢又成空今朝撒手還歸去木馬頻嘶物外風
書畢而逝

王奎其先大名人文公旦之後祖太常少卿逃避靖康難
自金陵再涉華亭奎風容韻亮好爲神仙方術自號蟾谷
真士嘗著蟾谷祛疑貫靈篇行于世嘉定寶慶間一再徵
不起卒之先一月遍告所知曰吾將頤化矣至期沐浴冠
裳而卒人咸異焉

見趙見趙
集

元

衛富益華亭人文節公涇裔宋亡設壇祭文陸死事諸公
詞極悲慘嘗負笈從金履祥許謙受學悉究性命之學許
卒爲制服歸隱居教授創白社書院于石人涇陽至大間
有司欲薦聞不就攜仲子隱于湖之金蓋山卒年九十六
門人私諡曰正節先生

曹知白號雲西其先永嘉大族宋宣和中景修始遷華亭
長谷之西知白身長七尺美鬚髯性機敏至元三十一年
詔遣中書左丞鑿吳淞江以策從行功俱多大德四年庸
田使柳公行水復獻寘闕成隄之法民甚德之丁母艱哀

松江府志 卷之四十五
毀盡禮服除大府薦教諭崑山不樂辭去嘗游京師王侯
鉅公多折節與交章辟屢上知白悉辭謝曰吾聞冀北多
奇士庶幾見之豈齷齪求官者邪即日南歸隱居讀易終
日不出戶庭或放筆圖畫掀髯長嘯人莫窺其際周恤姻
黨惟恐後篤于交誼若文士許應元李冲劉世賢詩僧崇
古生則延館死則爲治喪葬人稱貞素先生

余瑾居斡山因自號笥隱生幼時嘗夢掘地得大小墨數
百笏遂善屬文長好游名山至正間自具區道毗陵江抵
淮泗以直言干在位者弗用還讀書斡下著史補斷丹崖
夜嘯金聲錄玉露吟各若干卷或勸之仕則曰大丈夫仕

當爲天下除殘剗暴否則不如抱膝坐耳乃終其身

顧志云不

知其姓陳志云姓余蓋據楊維禎集考定耳

陸厚城東人宅東有圃自號東園散人貌古岸長身虬髯
博洽經史尤精孫吳氏書方兵變時將某聞其名覓不可
得或往來天目靈巖茗雪間兵息返故廬放浪三泖中或
竟夕忘返幼時嘗遇異人得子午按摩法療人疾不施鍼
炳對坐笑談頃疾卽脫去或勸之仕不應有詩集若干卷
號古漁唱

楊謙松江人別號竹西世居赤松溪上

張堰溪名

讀書不仕多

海內高人勝士之交嘗築小樓登眺海中大小金山題曰

不礙雲山樓楊維楨貝瓊俱爲之歌詠

孫道明字明叔華亭泗濱里人好古藏書萬卷遇祕本輒手自抄錄嘗築映雪齋延接四方名士較閱藏書爲樂又造一舟曰水光山色徜徉南浦自號停雲子嘗與陶宗儀共泛宗儀製詞道明卽譜入調中命洞簫吹之與擢歌相答極鷗波縹緲之思宗儀有記

陸泳字伯翔隱居大蒸盡心農事采方言習俗作田家五行以占豐歉楊維楨陸居仁叙而傳之

蔡訓字君立號東郊上海仕族子與江陰孫作善元末兵亂變姓名隱吳中事定還鄉築室漢成里扁曰東郊草堂

孫作爲記

王泳字季瀾上海人衡山主簿鏞之子也鏞卒遺命以庶弟奉其生母泳悉畀舊田宅而所居貧薄晏如也自號靜習或問靜何習輒對曰習不繇靜未嘗學也門生輩爲買龍華之原營壽藏泳角巾藜杖逍遙作歌歌闕長嘯而返梧溪王逢爲銘其藏

孫稷字長慶郡人言行謹飭嘗舉爲文學官兵興遂不仕築室于橫雲山之支隴名其居曰小山招隱讀書賣藥以終老焉時人高之

楊德懋華亭人善書法明左氏春秋尤究心太極圖通書

買田澱山之西躬耕不仕明初徵天下真才郡縣薦之命
下曰唐堯聽巢父之洗漢光遂子陵之高富貴非吾願也
卽自眇其左目以示廢疾不可用優悠湖上卒年九十二
里人稱之爲自廢公云

明

錢全袞字慶餘祖福宋承務郎自錢唐徙家華亭遂爲郡
人全袞通涉書史好禮尚文元末張氏據吳隱居盤龍岡
不爲其用所著書有韻府羣玉掇遺續松江府志子徵洪
武初舉秀才袞以清心潔已忠國愛民八字書于簡以授
徵後任綏德州判官克遵厥訓爲政有聲

任繼祖字季倫松鄉先生之曾孫喜讀書篤於踐履且勇
於爲義遇患難輒傾囊濟之洪武末以子勉之貴封鄱陽
知縣進封韶州府同知而布素自如暇日躬灌園植蔬以
自適郡大夫數造其廬亦不往見識蕭山魏文靖驥于少
年期以公輔及卒公爲之銘

黃鑑字明夫華亭人博學而貧三十不娶李進士萱慕其
賢以女妻之所資奩具甚侈悉遣還但織紉佐薪水晚年
結茅于山曰八峰小隱游息其中賦詩酌酒爲樂海內求
一見不可得年九十六卒門人錢福爲之傳所著有山樵
傳說

李年字成之性沈靜簡默終日端坐與諸生講解懇懇詳辯冀其有得而後已當英廟北狩年適鋤于園聞之涕泣彌日識者謂其隱不忘君年六十八卒學士錢溥與門人曹雲龍私謚為貞靜先生所著有一樗子集

顧聽青浦人其先顧仲瑛有別業在青龍之新江鄉至聽遂移家焉中弘治甲子科授建昌郡丞以慈廉著尋棄官自名孤松小隱足不入城市凡三十年集生徒數人教授躬親畚鍤死之日陳書數卷布袍竹杖而已

沈耀字徵德華亭人少為諸生好古文詞博綜羣籍購求手抄靡間寒暑性簡伉寡諧獨與張世美徐獻忠何良俊

良傳交歡嘗築室郡城結小亭四植花竹唐六如題曰雨興與數子討論經史其中以自娛

姚章字尙綱少厭薄舉業學詩有陶謝風書法宗黃魯直游學荆溪陽羨間愛其山水清僻遂移家焉後又至采石之紅木山市地數畝結屋棲遲壽八十四終葬于山麓

張允孝更名初字太初人稱貞白先生少游文徵仲之門工六書長於詩善繪畫璩之璞其弟子也晚居沙岡墓廬曰楓菴家日貧無一字外于四十年不踏城市陸文定樹聲指為雲間伯彝

陸郊字子野吳縣人寓居華亭好古力學為陳氏館甥陳



易簣時命其子中分田產郊攜室人避居村落儵然高尚
有梁伯鸞之致日惟讀書攻詩間臨摹古帖以自娛直指
尙維持行部訪人物莫方伯如忠曰有陸子野者詩類孟
襄陽字類顏平原人品類王孺仲真高士也尙公遂折節
邀之郊以葛布野服踞上坐人益高之所著有子野集子
應陽字伯生少負才穎詩翰爲時所重黃學士洪憲申文
定時行許文穆國俱折節交之建議修復孔宅復議擴郡
城饒有籌幹卒年八十六著述甚侈見藝文志中
田有相字道子年十七補博士弟子員性恬逸學使者按
部較士以醉失期遂棄去居湖上治圃藝橘爲林每秋深

時綠陰朱實侍父杖履行游其際具旨醕爲樂父因號橘
庄翁里中稱有相以季隱云

張昉字元旻華亭人力貧嗜學董侍郎傳策慕其人幣致
之不納卽時訪亦不報也居南郭之敝廬曰蚊蜚巢一僮
力作日得粟直以供晨夕僮死困甚假道院居之尋卒人
傳其題畫一絕云挈罌坐釣秋江湍沽酒容易得魚難世
間好物不在速三尺鱸魚晚上竿其風操可知矣

孫得原字本卿有雋才居東郊隙地半畝皆蒔草藥吟咏
其間病足常出乘一驢市少年每戲侮之得原佯不聞也
抵家其子士高掖之而下晚不能跨驢又負之而歸宋旭

松江府志 卷之四十五
畫荷父圖贈之工篆隸書洒洒有山水致孫孟芳能世其學

周紹元字希安學憲思兼長子蚤孤攻苦績學年二十困于病遂杜門學詩隱居藻里意豁如也性不可一世憤時激俗若稜崢不可近人亮其坦衷久而安之工八分精篆刻與弟紹節友愛所著有貴我編等集子裕度字公遠工楷篆事親以孝聞

李世邁字懷古世居郡城南少慕高隱喜讀奇書知天下將亂與其友沈蓮臺相約不婚爲父兄敦迫娶未踰年妻卒自是棄經生絕嗜欲所居一室高槐古梅竹爐泉茗典

至鼓琴一再行以自適每聞雨滴芭蕉聲輒欣然喜夜則忘寐人號曰喜雨翁開門授徒以自給研田有贏則于助葬贍嫠之事尤汲汲焉世邁中歲預作生壙及遺令壙中有題字云多壽多辱無榮無憂不滿甲子我將歸休崇禎十一年年五十九果卒沈蓮臺竟不娶時時讀書不爲人知以醫目治生一錢不妄取也見貧者又好施與終身一室一榻不改故處

陳繼儒字仲醇華亭人幼穎異能文章徐文貞公階器之長爲高才生與同郡董玄宰其昌齊名婁東王文肅錫爵招與子衡讀書 明山王司寇世貞亦雅重繼儒三吳名

下士爭欲得繼儒爲師友繼儒爲人通明高邁敦孝弟厭
聲華年二十九取儒衣冠焚棄之結茅崑山之陽山爲二
陸讀書地植名花廟祀焉號乞花場草堂數椽焚香晏坐
意豁如也或勉之曰食貧如堂上甘毳何因復就館餼楊
宮諭繼禮包學憲煙芳項中祕鼎鉉競延訓其子弟錫山
顧憲成講學東林招之不往也親亡卜葬神山之麓遂築
室東奈山杜門著述有終焉之志繼儒工詩文雖短翰小
詞皆極風致兼善繪事又博聞強識凡經史諸子以及術
伎稗官與二氏家言靡不精討間爲較覈異同或刺取其
瑣言僻事詮次成書遠近競相購寫海內金石碑版與大

冊高文徵請者無虛日東奈故郡僻壤繼儒爲洗岩疏壑
植榆柳構亭榭茶鐺藥臼左圖右史躡者比華陽洞府又
喜獎掖士類四方墨客騷人屢滿戶外繼儒片言酬應莫
不當意去暇則與黃冠老衲杖策窮九峰之勝酌三高士
墓泛泖尋楊鐵崖趙松雪曹雲西往來遺跡吟嘯忘返足
跡罕入城市董文敏爲築來仲樓招之臺使者按部以暨
郡邑長下車造訪其地方利弊及有裨風教事條對無所
隱言於督學楊廷筠建求忠書院祀方正學孝孺并錄其
遺裔止擴郡城大工議免縣櫃收解王府祿米諸役民尤
賴之修郡志三年成御史吳牲給事中吳永順侍郎沈演

等先後論薦謂繼儒道高齒茂宜如聘吳與弼故事屢奉
詔徵用皆以疾辭天下想望風軌庶幾陳搏邵雍之流年
八十二卒於東余精舍自為遺令纖悉畢具歿後降乩詩
句預刻時日貯篋笥中其精爽如此

松江府志卷之四十六

藝術

藝術者道德之餘也書數列于六藝故先之次莫如致
用故繪事居末今既以時代為序而世次之中又以類
從焉

晉四
人

陸機字士衡書入能品傳見文苑中

陸雲字士龍能書宋米芾稱其法若篆籀體若飛動傳見
名臣中

陸玩字士瑤善詞翰尤長行書宋宣和譜稱其筆力瘦硬

有鍾繇法傳見名臣中

張翰字季鷹能草書唐竇泉述書賦稱季鷹古貌磅礴如
疑陰斷雲垂翅一鶚傳見隱逸中

陳人

顧野王字希馮善圖寫亦工書傳見名臣中

唐人

陸贄字敬輿有書法傳見名臣中

宋人

李甲字景元華亭人善墨戲作逸筆翎毛有意外之趣米
芾畫史常稱之蘇軾題其畫謂郭忠恕後一人又有題畫

雁五言詩濟南晁補之亦和二章

元十九人

曾遇字心傳華亭人官安吉主簿前至元末被選入京書
泥金字藏經

王默字子章一字伯靜文澤子也

文澤傳在文苑中

身長八尺美

鬚髯善談論少任俠多藝弱冠更折節讀書書法趙孟頫
行筆甚捷徵至京書金字釋典擬官翰林力辭歸求書者
填戶父歿盡鬻書買山以葬雅好泉石遇勝處輒忘返尤
喜為人排難解紛張天雨稱其豪宕不羈有姜白石之風
子基明洪武初舉孝廉為潞州判官常著雪齋明鑑錄

曹永字世長知白子也

知白傳見
隱逸中

穎悟好學尤工八法正

書學鍾繇行草學二王善鑒古弱冠以蒙古字學進除安

州學正秩滿遷柳州馬樂縣都博鎮巡檢江浙行省辟爲

宣使

衛德辰字立中華亭人以身幹稱書學舍利塏銘

衛仁近字叔剛德辰從子書學黃庭經醞藉有風致傳見

文苑中

章弼字拱辰華亭人篤志經史識度清遠未十歲能作榜

署大字長益有名真行草篆皆師趙孟頫

莫仲仁華亭人病聾以醫鳴邑人某病蠱衆醫莫療仲仁

以峻劑吐蟲數升立愈某病寒逾七日發狂陰且縮法死

仲仁徐以常藥理之而平某病痢噤不食者七日氣殆絕

仲仁投以湯卽納食飲而起有大官病瘵衆醫爭進仲仁

望而走曰雖扁鵲不可爲已出門而殂其神驗若此

沈光明華亭人以治目鳴先世常受術于龍樹師內外障

七十二種悉能治而去之光明克世其學士大夫咸稱重

焉

陸怡字悅道華亭人嘗在杭州得遺珠值千緡候求者還

之尤善醫汴人段氏客比隣一夕溘死怡取馬櫪去底置

大釜上昇死者內之蒸以蔥藥及旦皮腐而氣復大德間

松江府志 卷之四十一
召至京師右丞相答刺罕哈刺孫使切脉竟曰丞相無疾惟左足大拇指一脉不到時哈孫欲試其藝先以物約之也稱爲神人欲官之力辭歸賜號悅道處士
徐復字可豫號神翁華亭南橋人海鹽州醫學教授其先宋濮陽太守熙遇異人授以扁鵲神鏡經頓有所悟遂以醫名世復尤精靈樞素問諸書其治病常審南北察強弱而緩急投之故百不失一會稽楊維楨病久痢不食飲衆醫皆曰元氣脫不可治矣復診之曰頃于西門視一劇証其脉與公等然公七日起彼不出三日當殂遂投劑至期愈而閱三日者殂矣維楨有歌紀其事

吳鍾山不詳其名家于華亭鍾賈山遂以自號人亦因而稱之善太乙九宮諸筭術自言其學得之父竹所傳之其父一峰江湖間推重其術而鍾山亦自祕不輕以語人會稽楊維楨至松江鍾山就見曰先生棄官已十年數盈十必變未有往而不復屈而不信者截自四十九而往爲下箸曰某年起某官某年移某所某年當調內某年當致其事而去後一如其言維楨有數說稱述之

張觀字可觀華亭風涇人少游江湖志尙古雅工畫山水師夏圭馬遠及見盛懋丁野夫而與吳珪游故其筆力古勁無俗弱之氣尤善鑒別古器物書畫元末徙嘉興明洪

武中寓長洲之周莊卒

蘇志云
嘉定人

張遠號梅巖華亭人善畫山川人物學夏圭馬遠潛補古畫無出其右臨摹亦能亂真

任仁發字子明善繪事世多稱任水監馬傳見名臣中

曹知白字又玄畫山水師馮覲傳見隱逸中其僕夏汲清亦能畫

瞿智字睿夫華亭人博學能詩以書法鈎勒蘭花筆致妙絕為黃潛段天祐李孝光張天雨所友重仕至文學官攝紹興府錄判尋棄官去

沈瑞華亭人得畫法于黃公望常為楊維禎作君山吹笛

圖木石幽潤山水清遠人物器具點綴絕工

曹煥章華亭人善寫生往往逼真見者相視而笑常寫席帽山人像陶九成騎牛及濯足圖

沈月溪亡其名華亭人以稜作為業畫山水人物學馬遠

明八十
四人

焦伯誠博雅工書傳見文苑中

陳璧字文東善書傳見文苑中

顧祿字謹中善行楷尤工分隸亦善畫傳見文苑中

朱芾字孟辨善書畫傳見文苑中

金鉉字文鼎華亭人工章草畫倣王叔明傳見文苑中子

鈍字汝礪官中書舍人亦工書

徐樞字叔拱華亭人元醫學教授復子也樞少傳父術兼學詩于會稽楊維禎會天下亂晦迹田里洪武二十八年年四十餘始以薦爲秦府良醫正出承棗強召爲太醫院御醫累奏奇績歷遷院使告歸展墓宣宗親賦詩送之遣中官二宮人一護還年八十致仕賜金帶又七年卒有足菴集行世子彪自有傳

相禮字子先華亭人滑稽多智略能詩善畫譚論縱橫不窮尤精于奕當世無敵明洪武中召至京師厚賜遣還誠意伯劉文成基常爲文贈之

夏宗文華亭人善具草隸書名重于時預修永樂大典授廣平縣主簿子正有才氣以鄉貢任岢嵐州學正衡自有傳

范鼎字文鉉華亭人工書傳見文苑中

張年字公壽華亭人慷慨高簡善爲文永樂中再徵不起隱于醫治療若神所著有杏園稿時稱爲杏園先生

俞寰字允寧上海人樸愿沈靜喜讀書工詞賦醫藥卜筮斷琴刻篆無所不通然不求人知終歲不一入城府

姚暘字啓明華亭人父潤祖元醫學教授好古博雅著聲吳越暘少孤事母孝世其家學洪武中以人材試行人宜

德間除莆田知縣有聲未幾辭歸號柳隱孫蒙字以正沈靜博學善醫尤精太素脉定人休咎若符契巡撫鄒來學常使視脉蒙既叙病原因曰公根器別有一竅出污水來學大驚曰此隱疾何由知蒙曰以脉得之左關滑而緩肝第四葉有漏洞下相通既久來學改容謝請藥弗予屈指計曰但還留臺五日可到來學解其意卽治行果抵會同館而卒蒙屢徵不起臨終作謝世辭警悟超脫蓋有所見云同時有沈元吉者切脉不逮蒙而明斷善用藥屢起危疾與蒙並稱

朱孔易名寅以字行華亭人筆力遒勁得書法之妙亦善

畫永樂初求四方能書士寫制詞孔易被選于翰林司內制成祖常御左順門召孔易書大善殿榜稱旨授中書舍人善書授官自孔易始後北京宮殿成皆命孔易題榜二十一年授翰林院編修宣德中轉春坊中允累官至順天府丞子奎字文徵亦工署書兼能詩歌年十二詔授學內書館後補國子生景泰中授中書舍人直文華殿累遷尙寶卿成化中坐事調廣東鹽課提舉量移保寧府同知尋召還職遷太僕卿改大理予從二品俸致仕卒賜祭葬沈度字民則以書名傳見名臣中

沈粲字民望善書與兄度齊名傳見文苑中

夏衡字以平宗文第二子也幼補郡庠生永樂中學士沈
度以善楷書薦授中書舍人供事內閣累官至太常寺卿
成祖北征宣宗討漢庶人皆預扈從嘗病醫云得瓊玉膏
可愈英宗聞而賜之至天順初英宗復位閱朝臣籍及衡
名曰是常受朕賜藥者耶衡在禁近最久謙厚縝密未常
泄禁中語時同事者多假內閣勢有所干求于外衡廉靜
寡欲公退閉門獨坐泊如也天順八年卒年七十有三訃
聞遣官諭祭命有司營葬事所著有樗菴集

吳敬字孟寅上海人以楷書生寫永樂大典書成入太學
擢行在吏部文選司主事歷遷員外郎郎中九年秩滿予
四品祿守本官久之擢太僕寺少卿以疾乞致仕正統四
年卒遣官諭祭

沈藻字凝清學士度子以父任爲中書舍人遷禮部員外
郎亦以書名孫世隆字維昌初名隆弘治十二年詔禮部
訪求故學士度及弟祭子孫張駿張弘至以隆薦召至京
試中庸義楷書早朝詩稱旨孝宗御筆改名世隆授中書
舍人典內閣制敕文字正德中忤劉瑾罷歸瑾誅詔復本
官

黃翰字汝申有書名傳見名臣中

章瑾字公瑾號采芝華亭人宋莊敏公之後能詩善草書

本江府志 卷之四十六
師法二王而峭健自成一家尤長于畫蓋張觀以後一人而已爲人雅淡有高致日登山臨水所至成趣遇知己觴咏竟日畫或傾刻可就或數日不欲著一筆寒山拾得像春江送別圖皆不媿古人同里吳子陵善畫山水亦有名于時

章昞如能詩善楷書仕至中書舍人

俞宗大其先河南人建炎南渡徙嘉興曾祖彬仕元爲浙江行省檢校始居上海竹岡西族大以盛人呼爲俞莊叔仲幾工書與宋克相友善宗大善楷法以薦授中書舍人歷吏部郎中致仕進階四品年九十餘卒子珙孫順皆能

書珙爲中書舍人正統中歿于王事順以卹叙爲國子生仕終南京鴻臚寺寺丞

張黻字孟著華亭人書學陳文東勁健有法起家中書舍人遷大理寺寺副至禮部員外郎第黼字孟昭官中書舍人篆隸得秦漢遺法

張源字復本華亭人少業嬰醫永樂中徵入太醫院供奉禁廷侍從北巡常受金繒之賜洪熙初賜第于皇華坊宣德中授御醫正統間遷院判丁母憂賜乘傳奔喪卽還職景泰中乞骸骨置第城西南隅有園池花竹之勝時出賜金以會賓客贍貧乏年八十有八卒

陳常字用恒上海人世業儒常傳外氏邵艾菴醫卽有名永樂十五年遣使下西洋常以醫士從歷洪熙宣德間凡三往返恭勤愿愨上官皆器重之常言海中行以六十里爲二更往返一千六百更爲九萬餘里行皆候風占星以針取路以干支取某山某嶼進某澳轉某門以至開洋避礁避淺皆以針定計所涉歷自占城至忽魯謨斯凡三十國平生足履人所不到目見人所不知未嘗自多臨終但曰今不葬魚腹矣子經字宗理世其醫教授里中循循有矩度

朱信華亭人父元祐元武舉千戶信精于算術永樂中累

官至戶部郎中相傳時斃某城使信計之當用磚若干既而有餘詰之謝曰此失料灰縫耳如其言度之不失尺寸子倫舉進士爲監察御史

顧子昇華亭人明九章算術永樂五年召至京試藝高等充戶部令史十五年授福建泰寧縣丞以老乞致仕曾孫曦能世其學有詩名

楊青金山衛人幼名阿孫永樂初以瓦工役京師內府屏墻始堊有蝸牛遺迹若異彩成祖顧視而問阿孫以實對成祖嘉之問其名曰幼名未改平方今楊柳青矣可名楊青仍授冠帶營繕所官一日小殿成以金銀豆頒賞悉散

于地令自取眾競往青獨後以是心重青後營建宮闕使
爲都工青善心計凡制度崇廣材用大小悉稱旨事竣遷
工部左侍郎其子某亦善父業官至工部郎青後以老疾
乞休卒賜祭葬

孫子奕博學能詩尤善脉藥常舉爲本府醫學正科

陸友仁名輔以字行華亭人大理卿沈祭弟子也善楷書
官中書舍人遷禮部主事

顧應文號石泉家府城穀市橋善画人物山水尤精釋道
像脫去習氣識者貴之宣德中徵至京時沈度兄弟以文
翰進寵眷異等應文恥之未幾謝病歸戒子孫曰汝輩努

力毋效吾所爲也

陸宣字廷旬華亭人號節菴能詩善畫尤長于傳神山水
不甚工而清澹蕭散無塵俗氣一時名人多與遊子翰字
公藩以太學生仕至知縣

吳子璘松江人山水學盛子昭亦能作枯木竹石

見朱謀
聖画史

錢溥字原溥書法蘇眉山傳見名臣中

錢博字原博小楷精妙草行書並工傳見名臣中

李亨字嘉會華亭人官太倉衛學教授善作大字援筆而
成若宿構者

葉藻字惟潔華亭人善行草天順九年鄉舉官至太僕寺

寺丞

何全字廷用華亭人自宋元來世以醫名全生而穎慧遊郡庠有聲正統十二年領鄉薦不欲徙故業益精岐黃術每以七劑起沈疴無責報意同郡張弼盛稱之曾孫十翼仕爲景楚二府良醫能世其業今郡中治傷寒猶首推何氏

徐彪字文蔚太醫院使樞子也正統十年以能醫薦入太醫院時代王久病瘧又昌平侯楊洪在邊疾篤受詔往視皆不旬日而瘳遂留御藥房十三年擢御醫景泰二年遷院判常侍禁中每以醫諫景帝問藥性遲速對曰藥性猶

人性也善者千日而不足惡者一日而有餘問攝生以固元氣對其因事納忠類此六年預修中祕書錄子澄爲國子生彪質直洞達善談議少從父入秦其邸舍元許文正衡遺址也秦王以魯菴題之秦中稱爲魯菴及歸老以詩畫適情自號希古所著本草證治辯明十卷論咳嗽條傷寒纂例各一卷

張駿字天駿華亭人景泰四年舉于鄉以字學名授中書舍人供奉文華殿累加吏部驗封員外郎山東布政司參議太常少卿光祿卿致仕歸正德二年起復故職以重書通鑑纂要勞進爲禮部尙書復乞致仕四年卒得賜祭駿

草書奇縱自成一家所著有一螻子集北游稿南山集

張弼字汝弼善草書恣態橫發不襲前人畦畛遠方求募至以十金購一紙傳見名臣中

袁佩雲南布政使愷子也佩子瓚父子皆能書並授中書舍人直文華殿

張元澄字靜夫工書與張弼齊名傳見名臣中

陸深字子淵善書正學顏平原行學李北海王世貞稱其風骨適麗小楷尤不易得傳見名臣中

王一鵬字一飛華亭人善書畫傳見文苑中

徐霖字子仁高祖伯時為蔚州知州自長洲徙華亭霖六

歲而孤從兄居江寧七歲能詩時稱奇童長為諸生見賞

于戴恭簡珊司馬堊然任放不諧俗竟遭誣黜落益肆力

于詞翰縱游觀聲伎之樂善製小令能自度曲篆法久微

自周伯琦後惟李文正東陽遠續其緒霖躬詣堂室蚤尚

雄麗晚益樸古殆登神品真行書皆入妙碑版法顏柳題

榜擅絕一時求書者恒滿戶朝鮮日本使臣皆珍購之武

宗南巡聞其名召見行在賜一品服再幸其第命從至京

會晏駕不及授官而還霖奉母至卒以生于松江自號九

峰道人或呼為髯仙年七十七卒

張電字文光上海人學書于陸文裕深從入京師為夏文

本江府志 卷之四十一
十三
愍言所稱嘗使書御製集禮序世宗見而嘉之遂薦入史館供事皇史宬建特命電題額詔賜金幣授鴻臚寺序班遷中書舍人漸被恩遇朝廟典冊必使書之世宗常表上帝帝玉冊電適在告留以俟者月餘遭母喪詔予假三月及期再促赴臧行幸游宴未嘗不從賜予優渥至遣攝大祀諸學士有不得比者歷遷尙寶丞太僕少卿太常卿兼司經局正字轉通政使工部右侍郎進禮部左兼官如故兩錄子入胄學電起布衣至卿貳恭謹儉素始終不渝故受知眷最深初世宗常賜夏言手札言漫書數字于尾一日忽被宣索言窘迫使電徒跣詣御前稱醉後偶污御札

請死世宗熟視曰非卿筆也由是怒言而眷電益厚電年五十一嘉靖三十五年卒贈工部尙書賜祭葬

浦澤字時濟上海人少與張電俱受陸文裕深書法能窮古人波磔之妙喜任俠常遨游吳越燕趙間晚歸就屢僻地惟法帖百卷偃仰其中慕漢逸民矯慎之風終身不娶平生嗜酒醉則安枕或一二日不起里中呼爲小癡

莫如忠字子良書法擅名署書爲明代第一傳見名臣中周思兼字叔夜善書能章草畫學米氏傳見名臣中

沈惠字民濟華亭人幼得異傳爲小兒醫能起死者嘗從浦南歸聞岸上哭聲甚悲問知某氏僅一子自塾中歸暴

絕惠走視其胸次尙溫作湯劑灌之遂甦有富家子患痘危劇已治木矣藥之而愈取其棺以施貧兒惠以小兒醫多祕其書不傳乃覃恩博考著書九種行世詳見藝文志學者以爲津梁有老媪善治疔惠拜受其方媪亡爲治後事惠爲人謹厚謙下無貴賤貧富必盡其心力立身有繩檢郡守子疾惠入視夫人從屏後告以病所由惠若不聞守訝之對曰夫人自向明府言耳其以禮自處如此晚自號虛明山人徐文貞階有詩贈之臨終賦詩而逝同時有王節之與惠並稱兩人相得甚歡遇有疑疾必相質正也節之子一鳳一鵬皆名醫一鵬自有傳

張鶴溪亾其名嘉靖中以醫名善療奇疾御史包節母年六十七暴中氣絕積日不蘇羣醫畢集皆曰風中臟腑不可治鶴溪獨曰此氣虛挾痰可下人參劑七日當甦甦能言鬼神事衆皆笑之旣而和劑以進如期乃寤道鬼神事甚詳衆醫始口噤走

何鑿字廷音華亭人宋何滄十二世孫也四世祖將仕郎侃善醫鑿習其業精太素脉龍華張憲副以雛僧腕帶金釧試之診鑿曰此脉清如入水珠乃方外孤子不應在公府中憲副歎爲神人又常視督學馮侍御疾知其父以暮年舉子及病所由起皆隱中云其四世從孫如曾字希魯

亦善察脉與牟廉張省廉交厚計偕走別如曾知其病已深謂曰禮闈尙遠緩行若何省廉不悟行次毗陵疾作還不旬日而歿常游蘇州某太夫人有危疾六脉俱沉羣醫束手如曾往視曰此經所謂雙伏乃陽回吉兆也以一劑投之得汗而愈

喬迨上海人家世業醫迨益精其術歲疫夢神人指示水中草云以是資爾活此方人且物色得之以治疫無不立起由是顯名技亦愈進第二子士琰字仲餘少好讀書有介操名似其父常出游遇富家子死一日矣士琰以一七投之遂甦其家奉百金爲壽不受晚年預營葬地作方塚

自爲銘曰黔婁之死正而不足千載以下踵其芳躅不能爲圓不能爲曲覩茲方塚不知其人而知其行獨士琰有五子第四子在修字三餘篤行長者其治病善用古方察脉精審所活人甚衆年八十餘無疾而卒

陸恕華亭人吳昭侯遜之裔專心于易精卜筮尤善望氣占星之法所言十不失一性至孝父患危疾然香于臂禱寶雲寺願以身代父疾尋愈年八十有四一日忽謂其孫庭藻曰吾將歸矣閱三日結跏而逝

張懋字勉之華亭人以國子生仕爲新建縣丞精符呪祈禱雨暘禁治鬼物皆有奇應謁選時陶仲文方有寵世宗

常出祕字以問仲文不能解聞懋名就訪焉懋爲具釋以進稱旨仲文欲薦與共事辭之後遣使求異書懋遺書悉入內府有俞若水者師事懋盡得其術資性穎敏過目成誦善爲青詞喜長夜飲竟病酒卒

張德讓字士美華亭人受書法于陸文裕公深規摹北海絕有風格莫方伯如忠亦推許之以跛足遂棄舉子業作病鶴賦以自况常乘籃輦過親友家竟日留連乞書者恒滿德讓飲微醅乃濡毫使兩童子對執綃楮不著几案揮灑立盡亦善繪事所製詩篇多淒其蕭瑟易令人悲以無子多散佚不盡傳

孫克弘字允執文簡公承恩子也以父任爲應天府治中常攝上元縣釐正糧差法著爲令縣人賴之擢漢陽知府會新鄭高拱修郟于徐文貞公階連及克弘罷歸拱故爲承恩所取士後屬所知致書招之克弘答書不復營進築室東郊以老克弘少敏慧博涉羣籍氣度蕭遠有晉人之風書倣宋克尤工八分畫水學馬遠花鳥似徐熙趙昌又善以水墨寫生及竹石蘭草無不臻妙遠近造請常滿戶外其倣米氏雲山作仙釋像世尤珍之所居鑿池種樹嘉林奇石自然絕塵有佳客至輒命觴嘯咏終日晚歲無留儲或解衣貰酒晏如也年七十九無疾而逝

莫是龍字雲卿以字行更字廷韓善書畫傳見文苑中
陸萬里字君羽華亭人善書于時莫雲卿早逝而董文敏
其昌後起故萬里稱獨步其昌少貧常作萬里書市之人
以爲贗弗售也萬里第萬言字君策萬曆五年經魁亦能
書畫

周紹元字希安善八分書亦工篆刻傳見隱逸中

璩之璞字君瑕上海人楷法妍雅善畫山水亦畫翎毛及
水墨花竹筆致矜貴蕭然清遠精于摹印在吳門文氏伯
仲間人品高潔不趨榮利士論多之

董其昌字玄宰書畫爲有明冠傳見名臣中

陳繼儒字仲醇能書畫山水氣韻空遠傳見隱逸中

顧正誼字仲方參政中立子也以國子生仕爲中書舍人
爲人高曠喜賓客其畫宗黃公望家多名人蹟又與嘉興
宋旭同郡孫克弘友善窮探旨趣遂自名家晚居濯錦江
上構小園林木清幽終老其間自號曰亭林

陳鯤字雨化性強記會倭亂遂習數學尤精六壬決策奇
中徐文貞公階旣謝政值張博構獄鯤占之得六儀曰其
兆太陽當位羣陰乃伏有兩貴人佐之某日夜半必獲美
信及期報新鄭被逐夜漏二十刻也張宮諭以誠未遇時
鯤成數謂當大魁天下徐文定光啓姚布政永濟皆于窮

困中識之後悉符合其子三省孫杰能世其學

范允臨字長倩官至福建參議善書傳見文苑中

王一鵬字啓雲性跡躡不羈多與酒人游父節之督過之

沈虛明獨曰我視此子目力不羣當悉授我術宋侍御定

字孫少慧一鵬謂宋所親曰此子來歲三月當發疹若將

發時有傾跌必且無幸明春果疹前三日失足仆亟延一

鵬至不投劑而去楊孝廉回山子甫暮暑日日暮啼不輟

聲一鵬曰能授我百金則生楊唯唯乃於堂中以灰畫地

置兒寢其中戒乳媪勿得近少間兒就寢覺以香薰飲少

許下之一服而瘥或問之曰此中暑氣乳媪體肥兒愈哭

抱愈不釋輒哭輒不乳臥之冷塊暑氣自消畫以灰者愚

彼不得迫視耳青浦諸氏素封止一子一鵬至撫弄輒云

公家艱嗣願再誕一二乃佳又指其兩婢曰痘將發矣皆

不治二婢果死兒亦尋天衆稱爲神人云雲間以小兒醫

獨誇江南者蓋自一鵬始

陳允誠字效參華亭人善鼓琴其音和平大雅得古人遺

意亦善奕爲人淳穆可親晚好乾竺之教年七十五卒子

詩字君采妙解琴理常以胡笳十八拍造爲琴曲抑揚怨

慕聞者感動焉先允誠卒得其傳者爲及門曹可述

宋懋晉字明之參政堯武從子穎敏絕倫幼見牧童驅牛

從壁上圖之輒神似稍長讀書頗愛博涉不樂爲經生言
去而學畫窮日夜臨摹古蹟已從嘉興宋旭受業參以宋
元遺法自成一家深于畫學富有丘壑若僊山樓閣之屬
經營位置莫能過也懋晉風度瀟灑與人交無城府雅善
談論好吟咏題跋殊工博物格古賞鑒家推之

趙左字文度華亭人與宋懋晉俱學于宋旭懋晉揮灑自
得而左惜墨構思不輕涉筆其畫宗董源兼有黃公望倪
瓚之意神韻逸發故爲士林所珍嘉興陳廉其高足也

吳振字振之華亭人工山水筆墨秀潤一時以氣韻爲董
文敏所稱賞者振與趙左稱雙壁焉

曹文炳字德章華亭人學于孫漢陽克弘善畫花鳥又從
宋旭遊受畫水法及寫竹石皆入能品年至八十餘卒

陳穀字粟餘華亭人與曹文炳同師爲著色花木鳥獸甚
工麗子儀字象之能繼其業兼畫人物所寫屏障甚多

朱蔚字文豹華亭人萬曆二十九年武進士善畫蘭工篆
刻同時姚裕字啓寧善畫草蟲有陳淳遺意

李紹箕字懋承按察副使日章孫從婦翁顧正誼學畫便
能競爽亦工詩以太學生仕爲南京鴻臚寺序班翰林焦
茲朱之蕃賞其詞翰大鴻臚王士性甚禮遇焉量移廣西
幕職轉江西都昌主簿涉歷並多山川之勝故運筆益蒼

老年至八十餘猶揮灑不倦其品行端介亦見重于時

顧懿德字原之光祿署丞正心子

正心在
獨行傳

畫做王蒙行筆

秀潔屏居東郊罕所酬應得者寶愛之子善有亦能畫

陳時榮字頤春華亭人精于醫理江西張植之客遊患羸疾時榮視之曰肺爲蟲蝕矣藥之下蟲二十餘形如蜂蛾羽翼皆具復下惡血悉有蟲蠕動百日而瘥有老媪往視女疾途遇時榮船亟呼求渡因請偕往至則女已絕乃覆其身以布沾井水漬委中穴刺血如泉涌遂甦上海喬時敏患寒疾毒留兩脛如錐刺法當截足時榮作大劑炊熟盛布囊中納足于內冷則易之五日起行如常矣時榮好

行其德每施藥以活人每遇有危疾輒終夕沈思必求愈之乃已年八十四卒第二子自道字太古從子明善字抱元並爲名醫明善三歲而孤時榮所撫立也

沈士充字子居華亭人出于宋懋晉之門亦學趙左兼得兩家法時名最盛郡人能畫者多師之

董孝初字仁常華亭人少能書爲諸生久不得志遂棄去放浪山水間中年作畫筆墨簡遠爲時所稱

秦昌遇字景明上海人天資警敏少善病因遂學醫治嬰兒疾稱神已而徧通方脉不由師授妙悟入微常行村落見婦人浙米使從者挑怒之婦人忿詬昌遇語其家人曰

林江原志 卷之四十六
若婦痘且發當不治吾激其盛氣使毒發肝部耳日下春時應見于某處吾且止是爲汝活之及暮如其言乞藥而愈青浦林氏子年方壯昌遇視之曰明年必病療三歲死明年疾作踰兩春竟死昌遇所剋時日皆不爽其或病至沈篤時師張口胎目昌遇投劑能立起名動四方往來無寧畧然未嘗自多嘗謂法當死者雖盧扁不能爲苟有生埋勿自我死之可矣爲人瀟灑自適預知死期年六十餘卒所著大方幼科痘疹折衷行于世

徐延賞字元識上海人好養生家言因精岐黃術屢起沈疴常熟令楊鼎熙病月餘徧求醫弗效延賞決爲痰疾以三劑起之吳淞朱總戎文達素無恙一日忽覺神思有異晚而歌笑不節飛騎邀視延賞曰此陰火乘肝晚動也予平劑遂復懸壺滬濱間爭禮致之延賞以供具過設多奉清齋又作戒殺文以勸常授太醫院御醫董文敏其昌雅重之贈以詩曰藥倩韓康賣門容尙子過五茸安豹隱萬里弄鷗波有子霑恩能世其業

奚鳳鳴上海人少業瘍醫尤善治癰疽能察人氣色預卜病日川沙帥蔣其仁先常患背疽至是復發使鳳鳴視之曰此昔年蘊毒故肌理墨腊也治之月餘而瘳膚加澤焉一日其仁弟在坐鳳鳴謂曰君不出三月疽發背矣及期

果然鳳鳴常言癰疽中潰積腐四周非吮之不得盡故治
病必募人以苦酒虛口而吮之其貧者鳳鳴卽親爲吮癰
其治他瘍亦多精思有張姓者左足拇指瘡三年不能行
鳳鳴以刀破其患處扶出一蜂遽起徐步其神異類此
方叔毅字百里上海人工貌人物神氣生動溢于楮素間
常遊錢塘募擔夫荷行李竊逸去乃寫其形狀于城闔見
者皆曰某坊陳二也因捕得返其橐或謂之曰君能捐棄
筆墨游心太虛僧繇龍眠可並駕矣叔毅憬然歎曰惜我
少年不聞此自今請以子言爲師未幾病卒年僅四十餘
松江府志卷之四十六 終

松江府志卷之四十七

游寓

我松介在海陬四方之游蹤罕至宋以後高人多棲逸
于斯亦有游宦不歸樂土風而卜宅焉後遂繁其族者
今並得綴集之云

宋

八人

邵桂子字德芳淳安人咸淳間以博學宏詞登進士第教
授處州國亡不仕娶華亭曹澤之女因家小蒸爲斯文領
袖者四十年八十二卒所著有脞談稿又作忍默恕退四
卦以自警子祖義池州學錄能詩工篆隸孫亨貞字復孺

博通經史贍於文辭書擅四體凡陰陽醫卜佛老之學莫不究其奧洪武初爲府學訓導以子累謫戍穎上者久之後終於橫泖年九十三所著有蛾術集若干卷稿皆手筆點畫不苟云

俞韋齊汴梁人侍孝宗讀有詩名而好方外之學遍游名山至雲間擇紫岡家焉其七世孫曰仲明號湛然子游心好道父歿奉喪葬東海上結廬其傍事母尤謹

高晞遠通州人咸淳德祐間通判平江府自城潰家散笑然一身浮游江湖嘗館於衛叅政涇家晞遠學問該博尤精邵堯夫之學

陳宏莆田人宋末徙居華亭以儒業起家遂於易嘗著易象發揮易孟通言童子問

林景曦字德陽別號霽山溫之平陽人咸淳辛未自太學釋褐授泉州教官歷禮部架閣轉從政郎元兵南下遂不復仕至正戊寅總江南浮屠楊璉真伽盡發宋諸陵時景曦故爲杭丐者背竹籬手持竹夾遇物卽以夾投籬中鑄銀作兩許小牌繫腰間取賄西番僧番僧左右之果得高孝兩朝骨爲兩函貯之歸葬於東嘉聞者敬仰咸稱霽山先生往來吳越殆廿餘年居雲間甚久有雲間懷古神山訪僧二陸故居濼湖黃耳塚諸作所著詩文集十卷士林

傳誦之

殷羣號古溪娶曹學諭女因居小蒸至今呼其地爲殷莊
仕宋至轉運司幹辦公事

吳惟信字仲孚湖州人寓居白鶴邨以詩鳴吳郡人糜弁
見惟信文亟稱之一日相遇扣所作惟信誦一絕云白髮
傷春又一年間將心事卜金錢梨花瘦盡東風軟商畧平
生到杜鵑糜不覺下拜曰天才也

趙孟僴號月麓宋之宗室其先家黃巖景定辛酉年十七
文天祥見之曰是子瑚璉器也咸淳乙亥開江東浙西閩
天祥以玉垣從事辟之偕行抵吳僅五十日而大事已去

大祥赴召環衛王邦傑開門降元授邦傑安撫使孟僴吳
江尹固以疾辭遂去吳依親友以居越十年爲道士名道
淵居松江北道堂又五年爲僧名順昌因自號三教遺逸
改道堂爲本一菴所著詩文名湖山汗漫集內有遙祭文
丞相文臨終端坐手辭以訣有云文山之客千古忠貞

元二十
四人

葉李字亦愚贅居華亭宋少保夢得之後也李在宋以太
學生上書詆賈似道似道怒嗾林德夫誣以金飾齋扁不
法黥流嶺南及放還與似道遇諸途贈以詞云君來路吾
歸路來來去去何時住公田關子竟何如國是當時誰汝

誤雷州戶厓州戶人生合有相逢處客中頗恨乏蒸羊聊
贈一篇長短句元世祖平江南與王泰來同召授以官凡
軍國大事必與商畧一日不在列問其故則病足遂以所
御五龍車召之至命坐而諮決焉累官至中書左丞

趙孟頫字子昂吳興人宋太祖秦王德芳之後仕元累官
翰林學士承旨嘗往來松江南禪普照亭林及泖上崇福
寺最數梁棟皆其手題而寶雲碑尤爲世所傳娶泖西管
氏名道昇能寫竹畫大士像工書小蒸尚稱管道云

任士林字叔實家奉化松林鄉人稱松鄉先生其先蜀綿
竹人宋少帝希夷之後八世祖始來居奉化再徙崎山十

林六歲能屬文趙孟頫袁桷輩咸推其文謂今之柳河東
云大德間携家華亭與衛山齋謙善有訪山齋詩及興聖
塔華藏院諸記至大初舉爲安定書院山長明年卒葬松
林鄉子耜由松江府史至兩浙鹽運照磨致仕會天下亂
子孫遂家華亭

呂克勤字勉夫東萊人申國正獻公十二世孫性豪邁不
羈學問該博能文章以醫名世游松江與邵桂子爲文字
交子紹聞孫文虎

柯九思字敬仲仙居人以廕補華亭尉遇文宗於潛邸及
卽位擢爲典瑞院都事置奎章閣特授學士院鑒書博士

寵顧甚隆以言罷出文宗崩因流寓松江時往來玉峯吳
閻九思善畫竹石得文同筆法嘗自謂寫幹用篆法枝用
草法葉用八分或用魯公撤筆法木石用金釵股屋漏痕
之遺意卒於吳中

楊瑀字元誠錢塘人性警敏博學長身紫髯如畫天曆間
召見奎章閣命篆洪禧明仁二璽文稱旨署廣成局副使
擢典簿中瑞司與密謀草詔黜奸臣伯顏超授奉議大夫
太史院判尋同簽院事江南盜起改建德路總管得謝來
松居鶴沙鎮追論平賊功陞浙東宣慰不赴遂老於鶴沙
初瑀在太史時上從容詢其鄉土對以西湖葛嶺之勝御

書山居二字賜之因自號山居所著有山居新話卒返葬
葛嶺云

黃公望字子久相傳莆田巨族一云常熟陸神童之弟出
繼永嘉黃氏黃氏父年已九十始得之曰黃公望子久矣
因而名字焉性聰敏博極羣書百氏九流之術無不習而
通之補浙省掾忤權豪棄去黃冠野服往來三吳間開三
教堂於蘇之文德橋至松居柳家巷後隱杭之笕箕泉已
歸富春年八十六而終公望善畫山水初師董源巨然稍
變其法自成一家所著寫山水訣至今宗之與曹知白善
多畱小蒸今此地有精九章算術者蓋得其傳也

葉杞字南有號漪南先世居京口有別業在淞之吳滙杞讀書負才譎前太史楊瑀守建德辟掾辭兵興進士李國鳳經畧南土杞密陳時事十條李嘉納之授進義副尉丹徒縣主簿將別任之而柄移藩鎮乃築草堂於魚鱗涇上顏曰漪南秘書卿貢師泰爲序楊維禎魯淵爲歌詩王逢爲楚音二章以樂之遂老於松

孫華孫字元實永嘉人寓居華亭孝友文雅善方脉爲醫學教授自幼得詩名年十七嘗賦樹諼堂詩鄉先生衛謙亟稱賞曰詩意涵蓄有諷有刺率爲大篇不可及也今子孫遂爲邑人

劉世賢字希孟東光人宋丞相忠肅公鞏九世孫也忠肅善琴子孫世其學其後徙湖州至世賢遂以琴名浙右爲人端重持論正大虞文靖公集嘗贈以文游松江與曹知白善至正癸巳卒小蒸歸葬湖州子孫遂家於松世稱善琴有名鴻者尤著

王逢字原吉江陰人才氣俊爽弱冠有令名臺臣薦之以疾固辭大府交辟皆不就會世亂客游吳中築室青龍江上以吟咏自娛初祖母徐夫人嘗手植雙梧於故里之橫河逢追思之因名所寓曰梧溪精舍所著有梧溪集火魯忽達漢名魯得之西域康里人平章冀國公保八子

松江府志 卷之四十一
也性重厚安貧好學弱冠爲館甥於小蒸曹氏挈家入燕
中乙亥大都鄉試以父蔭授晉寧治中改監長興州秩滿
仍居小蒸歷漕運萬戶浙東元帥入爲利用監大卿以卒
子企賢由直省舍人仕至吏部尚書

邁里古思漢名吳善卿西夏人僑居松郡至正甲午登進
士授紹興路錄事司達魯花赤撫字周至民愛之如父母
杭州之尅復也左丞楊完者統洞苗恣橫劫掠邁里怒叱
吏兵殲之苗盡死江南置臺於越檄邁里督義兵招果毅
軍分守要害永康寇起據縣邁里談笑復之除廉訪司知
事遷建康道經歷除行樞密院判官時御史大夫拜任哥

統臺軍二千紀律不嚴民罹其害邁里輒抑之又不爲拜
禮或諫之曰吾知上有君下有民耳安問其他拜聞其語
銜之會與方國珍部兵戰不利馳歸遂遇害于拜第民麻
跣慟哭從之者萬餘人事聞贈中大夫僉江浙樞密院事
封西夏侯謚忠勇

貢師泰字泰甫宣城人泰定四年釋褐出身至正中自禮
部尚書爲平江路總管甫視事而淮兵至守將莫能支師
泰率義兵出戰不敵懷印走松江嘗寓靜安寺賦招提八
詠其滬瀆壘一章忠憤之氣猶可想見云

章齊字叔敬江陰人少喪母趙侍父孝謹長善詩尤好琴

松江府志 卷之四十一
至正十五年八月守臣構亂遂奉父隱于淞亂定歸踰年
城陷失父齊草舍露行間道訪候兵後躡奔吳門且物色
諸昆弟姪姓之流散者而父終不見乃哀毀致疾七日呼
子庠具紙筆書蓼莪詩卒年三十七庠以鄉里梗隔葬上
海之輿原王逢志其墓

楊維禎字廉夫會稽人泰定丁卯進士由天台尹改錢清
場鹽司令時鹽賦病民維禎屢白江浙行中書弗聽乃頓
首涕泣至欲投印去始獲減額餓丁內外艱結廬於墓不
調銓曹者十年會有詔脩遼金宋史維禎作正統辨千言
大司徒歐陽玄讀而歎曰百年後公論定於此矣將薦之

又有尼之者久之除杭州四務提舉尋陞江西儒學未上
汝穎兵起僻地富春山依元帥劉九九張士誠知其名召
之不往復上書斥元丞相帖木兒貪賄養亂丞相惡之遂
携家寓華亭築室百花潭上號小蓬臺洪武二年聘至京
師脩纂維禎不樂仕詠買妾詩云買妾千黃金許身不許
心使君自有媿夜夜白頭吟僅百日稱肺疾歸未幾卒年
七十有六

張昱字光弼廬陵人仕爲江浙行省員外郎行樞密院判
已而棄官張士誠招之辭以詩與楊維禎相得遂寓松江
號一笑居士洪武初召至京深見溫接以老乞歸上憫之

曰可閒矣厚賜遣歸更號可閒老人年八十有三卒

楊乘字文載濱州人少負氣博涉經史由叅謀府掾累官
監察御史遷江浙行省員外郎至正壬辰杭州陷非罪坐
黜依青龍章元澤以居丙申松江陷或傳張氏將起乘笑
曰吾豈事二姓使果至乘知不免命子具禮享先祠畢設
飲起行後圃中顧西日晴好慨然曰晚節如是足矣誨其
子治畦處置家事如平日夜分就寢遂自縊遺書言死生
如晝夜不足介意正以得全臣節爲快云乘死二年臺臣
白其前後事贈官賜謚錄其子卣山東宣慰司都事卓清
忠書院山長

張憲字思廉會稽山陰人家玉笥山自號玉笥生少力學
有志旣壯負才不羈薄游四方慕魯連子爲人不治產業
年四十猶不娶方承平時走京師謁貴人談天下事衆謂
之狂及淮西兵起首抗大議復不報去入富春山爲方外
游一旦升高望遠若有所覩退謂所親曰吾亟去汝輩亦
慎毋居此衆不信俄寇至兵死者五百家嘗學於楊維禎
往來松郡中湖山名跡多見之詩云

錢惟善字思復號曲江錢塘人博學能文章長於毛氏詩
領至正辛巳鄉薦仕至副提舉寓居華亭與楊維禎陸居
仁結詩文社有羅刹江賦著名於時所刻思復稿華亭夏

溥序行之

薛倫字叔道與兄儀隨父琮任監支松江從楊維禎遊通
春秋善詩與琴洪武中舉賢良方正以母老不仕留吳中
讀書七年始歸

謝應芳字子蘭毘陵人兵亂南遷居吳之葑門轉婁江渡
吳淞寓篠涇年踰八十歸老其鄉之橫山平生博雅好古
在鄉郡嘗請復鄒忠公祠寓吳又請復顧元公祠墓所著
述有思賢錄辨惑編詩有龜巢摘稿
馬磨字公振太倉人元季避兵於郡南園池亭榭幽闐自
娛屏絕世慮日誦經史爲人不事脩飾樂與賢士大夫交

長於詩歌有醉漁草堂二集

洪恕字主敬金華人避兵華亭性孝尚氣節能詩善行草
以講授終

陶宗儀字九成其先由閩之長溪徙永嘉陶山再徙台之
黃巖少舉進士一不中卽棄去務古學無所不窺出游浙
東西文師潞國張翥永嘉李孝光京兆杜本字學舅氏趙
集賢雍家甚貧抵松教授弟子遇人以誠平居寡言笑至
論古今人物上下數千年竟日不倦至正間辟舉行人校
官皆不就張士誠據蘇議署軍諮不往洪武辛亥詔取天
下士癸丑命守令舉人才又以病免藝圃一區果蔬薯蕷

度給賓祭已餘悉種菊栽接溉壅身自爲之間遇勝日引
觴獨酌歌所自爲詩撫掌大噱人莫測也宗儀崎嶇亂離
幾二十年喪葬祭禮備盡其力人以孝稱家城北泗水之
南買地結廬以老晚益閉戶著書詳藝文志中其未脫藁
者不與焉

明三十
人

孫固字以貞生元泰定間恬曠博綜長於詞賦不樂仕進
杜門脩業洪武初辟署莘亭縣學事與楊維禎陶九成善
名其齋曰聽雪因自號焉胡祭酒儼爲之記

成廷珪揚州人避地海上淹貫百氏嘗闢萬竹樓于吳滙

好歌詩尤長于律有居竹集行世卒遂葬焉

賴良字善卿天台人宋名臣好古之裔以詩鳴客雲間楊
維禎王逢錢萬皆與唱和嘗采東南詩人詩會曰大雅集
一時稱爲盛事

倪瓚字元鎮號雲林無錫人清姿玉立性好潔多讀書詩
名與虞范諸公埒閒作山水小景高韻絕世然不輕作家
故饒一日棄田宅去曰天下多事矣吾將遨遊以翫世自
是往來五湖寓居松之泖上尋歿江陰張端表其墓

貝瓊字廷琚崇德人天資夙出厭棄舉子業力追古作與
楊維禎諸公游好時教授雲間所著清江稿雲間集居其

半洪武初徵脩元史歷官國子博士

楊仁壽號漁隱天台人元季亂挾演易術來居於松之陶溪能詩文精草書得鮮于樞家法以子爲東昌守酗酒得罪死坐戍遼陽卒以書法動主帥得歸更號生還叟年八十餘卒

王嘏字伯純揚州人通春秋任府學訓導因家華亭有龍洲集

李暉字叔如冀北人父可壬元季爲華亭尹遂入籍華亭善醫學能詩文有稼翁集及湯液本草

華文瑾號雲林無錫世家也避元季亂奉母來寓於松積

學好古舉人才不就教授鄉里年六十二卒

秦裕伯字景容大名人從父仕元都就學胄監登第累官至福建行省郎中會世亂棄官寓揚州復避地松江之上海以養母時張士誠據姑蘇遣人招之拒不納吳元年上命中書檄下松江起之裕伯對使者曰裕伯受元爵祿二十餘年背之是不忠也母喪未終忘哀而出是不孝也不孝不忠之人何益於人國乃上書於中書固辭洪武元年省臣復檄起之裕伯稱疾不起上乃手書諭之曰海濱之民好鬪裕伯智謀之士而居此地苟堅守不起恐有後悔裕伯拜書遂入朝裕伯博辨善爲辭上欲命以官屢以故

辭後以爲待制

孫作字大雅一字次知江陰人自曾祖徵川傳至作而學益大門弟子以尚清先生稱之而不名著書十二篇號東家子詞旨閎博至正兵起挈家入吳盡棄他物惟載先代藏書兩敝簏張士誠聞而廩給之卒以母病謝去用是益貧熙怡自若久之衆爲買田築室於松焉洪武癸丑召纂修日曆授翰林編修官乞外授太平府教授三年選學官內任除國子助教明年分教中都又明年還成均又明年陞國子司業後終於漢成里所著有滄螺集宋太史濂有東家子傳

李象賢台州人寓居華亭明春秋學洪武初爲縣學訓導子銅字至剛以字行傳見名臣中

李寬字處仁原名可禮其先東平人父鎮撫松江萬戶因占籍華亭少偕弟可才輩從魯道源受春秋年十六魁江浙省榜世亂隱居不出洪武初袁凱俞允等以人才薦臺使黃克庸聘署華亭訓導與掌教胡儼朝夕飭學宮端士習郡稱得師滿九載陞安遠令以述職赴京病歿子萱繼登永樂庚子鄉舉有司表其堂曰世桂

錢萬字得鉉號艾衲生吳興人從楊維禎讀書郡中一室如破舟啜菽飲水力學不怠以古文辭名洪武癸丑冬舉

天下巖穴之士曰秀才曰人才而松江以秀才人才舉者三人一馮恕授湖州府學官一良用授高州府茂明邑長一卽舊授國子學錄曾孫浩字宗海永樂癸卯鄉試第一爲山陰令有賢聲

宋克字仲溫長洲南宮里人少跌宕不羈好韜畧將北走中原會道梗弗果家居以氣節自勵性伉直人有過輒面折之與人議論據事析理期於必勝一旦厭事閉門謝客操觚染翰日費千紙遂以書名章草久不傳至克始得其法游松江寓城東俞氏郡人多學其書陳文東壁嘗從授筆法吳僧善啓謂宋筆正鋒陳多偏鋒以是不及云洪武

中同知鳳翔府卒

張樞字夢辰自陳留徙家華亭以明經薦爲松江府訓導淡于進取築室西郊日讀書莊詩媿黃初兼工行楷爲名流景仰年過八十昂然壯健世共指爲神仙弟璧字景辰舉洪武三年鄉試好題詠仕蜀府典寶

楊基字孟載其先蜀人徙蘇州文采秀麗爲名流所稱洪武初游松江爲府學訓導與丘克莊錢希賢同官

王震字以東蘇州人慎密清白洪武初嘗徵較大祀樂後徙華亭時初頒大成樂諸郡皆聘震教習永樂初復徵以

八音圖
洪武
王震著
八音圖彭溪稿

天下巖穴之士曰秀才曰人才而松江以秀才人才舉者三人一馮恕授湖州府學官一良用授高州府茂明邑長一卽真授國子學錄曾孫浩字宗海永樂癸卯鄉試第一爲山陰令有賢聲

宋克字仲溫長洲南宮里人少跌宕不羈好韜畧將北走中原會道梗弗果家居以氣節自勵性伉直人有過輒面折之與人議論據事析理期於必勝一旦厭事閉門謝客操觚染翰日費千紙遂以書名章草久不傳至克始得其法游松江寓城東俞氏郡人多學其書陳文東璧嘗從授筆法吳僧善啓謂宋筆正鋒陳多偏鋒以是不足云洪武

中同知鳳翔府卒

張樞字夢辰自陳留徙家華亭以明經薦爲松江府訓導淡于進取築室西郊日讀書莊詩媿黃初兼工行楷爲名流景仰年過八十昂然壯健世共指爲神仙弟璧字景辰舉洪武三年鄉試好題詠仕蜀府典寶

楊基字孟載其先蜀人徙蘇州文采秀麗爲名流所稱洪武初游松江爲府學訓導與丘克莊錢希賢同官

王震字以東蘇州人愼密清白洪武初嘗徵較大祀樂後徙華亭時初頒大成樂諸郡皆聘震教習永樂初復徵以老疾辭所著有八音圖彭溪稿

松江府志 卷之四十七
車程天台人寓籍上海經行脩明工古詩文

曹睿字新民温州人爲府學訓導占籍華亭通詩書一經詩文號獨叟集

俞從隆字在明錢塘人洪武初鄉貢進士累官河南行省郎中以病免寓居郡城明春秋善詩文後以壽終

李肅號杏林大父晉卿元江浙西湖書院山長十歲喪父初習岐黃從金華趙雲居游趙爲朱丹谿門人元季肅遊松江遂占籍焉醫名日振永樂初膺薦拜松江府醫學正科年幾七旬復被召拜命卽行奏對稱旨賜金織段服二襲日食大官未幾扈駕北征給以從人名馬及諸禦寒之

具或惜其年老不勝跋涉肅正色曰恭逢萬乘爲天下蒼生而行吾何敢以老身爲惜不思報上恩哉子敬舉永樂丁酉念肅年老上疏乞就祿養特授上海儒學訓導遇假必放舟泝潮夕發曉至上堂拜壽信宿而返如是者十載孫祥天順丁丑進士

余學夔台州人方正學孺被收時寧海尉魏澤匿其幼子德宗學夔微聞之變形佯狂乞食于市一日迎澤于城隅作狂歌曰當年豫讓豈純臣猶肯吞炭併漆身堪笑今來執政者叩頭新王乞恩綸不慚周粟可偷生首陽節義如飄萍向日都俞今反目區區尚願效程嬰澤默會之叱

日扶顛子出城去兩日後復遇在市仍作狂歌澤乃密致書將孝孺文稿併德宗盡托之學夔逃赴海島彌月及松江青村學治繒網易米日給潛入城訪進士俞允允以孝孺門人家居不仕三叩乃得見呈澤手啓大驚遂匿德宗於家長史任勉以金遺學夔不受意欲他徙勉出試錄示之知亦孝孺門人也始安然跡絕城市終不詣任氏德宗後冒姓余而學夔亦有子孫世居白沙里

麴祥字景福其先永平人永樂初侍父百戶亮調任金山戊戌值倭寇被擄時年四十久之轉商日本其王聞祥中國人召見大悅留左右改名元貴爲土官畜有妻子然不忘中國屢諷王入貢宣德壬子與使臣抵京上疏陳情乞賜歸侍時方柔遠不欲遽留之遣令還國詔諭蕃王仍給驛暫詣金山乃知父亡惟母尚在持抱慟哭悲動隣里重違王命別去至日本啓以聖諭王允之仍遣入貢乙卯達京師復申前請詔許襲職歸養祥歸事母以孝聞年八十餘卒

馮淮字會東一字雪竹初居崑山安亭好吟詩往來松江陸文裕公深讀淮詩請爲社會子遷與遂俱能詩深子楫以江上別業贈淮爲居父子力耕其間後日本入寇乃走上海城中潘錄事爲分宅居之士大夫爭相迎款焉遂嘗

以踐更匍匐公庭邑令屠隆問得其名遽令釋囚服延坐
遂亦傲然上座時人兩賢之淮有江臯集遷有長缺齋集
遂有馮子潛詩草南游稿

過璘字大璞平湖人成化丙戌進士父仍贅郡人顧氏因
家華亭璘舉進士猶以平湖貫故自號半松由工部主事
歷江西按察副使爲人闔朗方直歷官有能聲當路不悅
遂致仕正德己巳卒年七十九

沈椿字元齡號春江錢塘人寓華亭爲人直戇遇人有不
平事面發頰爭辨之以是呼爲沈義氣究心醫學熟於本
草察脉立方多取奇驗時方雙江廉爲郡太守椿內弟也

三年未嘗入官舍亦未嘗以片語及之時服其有守

吳孺子字少君蘭谿人性好遊嘗遊雁宕樂其奇峻絕糧
啖蘆葍四十日猶不反與王世貞兄弟何良俊戚元佐趙
用賢余寅沈明臣輩相友善過松江南禪寺後移居東柰
白石山房依章憲文以居少君喜詩歌學杜少陵又善畫
鷄鶩水鳥間畫山水幽峭閒適嘗過穀亭道中見有瓠奇
甚以數縑易爲瓢至荆溪遇盜擊破抱而泣者數日王世
貞爲作破瓢歌唁之故又號破瓢道人年八十二卒王太
學穉登爲立傳鄒學憲迪光誌其墓

宋旭字初暘居崇德縣之禦兒鄉以畫名海內萬曆初游

松江府志卷之四十七
雲間從陸文定樹聲莫方伯如忠周學憲思兼諸公結社賦詩嘗往來西郊居超果四賢祠禪燈孤榻世以髮僧高之年八十無疾而逝

彭齡字幼朔萬曆庚寅間曾寓松江或稱江鶴號甌甌子或稱祝會海或稱鄒長春莫詳其氏籍始與董太史其昌游年七十許越三十餘年復至松携一侍姬二小鬟董太史迎館之幾半載忽欲南游復移家去行時以雙櫬自隨坐化於廣陵喜飲酒善養生家言亦能詩濡翰日可百牋或言齡嘗舉孝廉令某邑又云貴筑人

松江府志卷之四十七 終

松江府志卷之四十八

列女

女之以才遇見者百不一二餘皆所如不幸誓死靡他雖流聲簡冊馳譽將來亦足哀也而風俗從可觀矣

三國吳人

張白妻陸氏績之女也績爲鬱林守時所生因名鬱生年十三嫁同郡張白三月白兄溫廢徙白死誓不再嫁姚信表之

晉人

陸氏機雲族女適會稽張茂茂爲吳興太守值王敦問鼎

執正不移敦遣沈充攻城殺之陸乃傾家貲率茂部曲爲
先登以討充充敗乃詣闕上書謝茂不克之責詔褒茂夫
妻忠烈金加封爵

唐一

韋夫人者南康王之女叔也適溧陽令陸侃卽宣公贊之
母溧陽卒于官夫人訓公成大儒作唐賢相德宗敕迎至
京師道每置驛時人榮之及卒皇后賻遺因葬洛陽見權
德輿所爲文

宋二

湖陰女子姓詹氏秀州華亭人僑寓湖陰其父詹先生老

且貧以教授爲業獨與一子一女俱贍以女工給先生朝
夕嘗手抄古列女傳至暮夜必熟誦數四而寢雖寒暑不
廢也鄉人咸異之淮寇張遇寇湖陰邑皆遁走先生泣謂
女曰吾死無恨奈若何女曰父獨何憂吾計久決豈得父
子俱生邪頃之賊至欲殺其父兄女謂賊曰吾父貧且老
君意不在金帛願執巾帚請釋父縛賊命遣之女行數里
過東市橋躍入水而死

郭氏光祿大夫郭三益之女孫適雲間葉氏蚤寡因誓節
爲尼名正覺居法雲寺能詩有一絕云春朝湖上風兼雨
世事如花落又開退省閉門真樂處閒雲終日去還來後

人景其志節刻詩于石以銀填之豎于覺骨塔前

元十七
人

管夫人名道昇字仲姬泖西小蒸人歸趙孟頫封吳興郡夫人天姿開朗德容俱備翰墨詞章不學而能嘗手書金剛經至數十卷以施名山天子命夫人書千文敕玉工磨玉軸送秘書監裝池收藏又嘗畫墨竹及設色竹圖以進蒙賜內府上尊酒謁典聖宮皇太后命坐賜食恩意優渥受知兩宮卒年五十八

陳氏錢塘儒家女其夫縣曹吏因兵亂隸軍籍戍於華亭夫久出不還聞雁有感因題于華亭戍壁曰浪喜燈花落又生夜寒頻放剪刀聲遊鴻不寄征夫信顧影娉婷無限情或勸之曰若美且慧往富室爲紅女不猶愈于守空戍乎答曰饑寒小事耳失節莫大焉久之夫還人咸頌之翠娥秀李姓趙之娼女也旣笄以處子適鎮守松江管軍副萬戶石薛徹都爲小婦居數年無子徹都卒秀時年二十五服喪過哀固護指甲示無他志父母憫之改適對曰爪折可也然護之愈嚴薛徹都子世爵事之如母秀復脫簪珥道裝益明其志年踰八袞爪長尺餘以終

劉氏燕山入幼失父母倚兄以居贅壻松人爲逋亾戍卒而有妻者久之會赦因給劉曰吾歸省須春復來間數年

松江府志 卷之四十八
劉訪于松壻不之認劉乃捩心痛哭曰良人我棄我將安歸由是剪髮日誦佛經行乞于市旬構一室製棺夜臥其中五十餘年鄰火劉大呼隣人乞與闔棺以畢吾志救者從之與室俱燬

顧氏二貞長曰中次曰和顧亨女也胥字而寡中慕古貞烈操非節孝事弗語和剪髮自堅父母議婚皆不聽及卒臨川奉智題其墓曰處女墳吉安楊清爲二貞傳

陸貞婦趙氏吉安幕長澤孫女鄞處士陸燾妻至正間兩浙多虞燾辭海寧主塾與趙隱居松之瓢湖丁未夏四月海隅有警兵猝至燾偕趙倉皇赴舟同難者爭舟燾竄登岸將復攜趙以行而兵偏之傷刃者三逐仆深淖趙竟自投于淵當時有歌之者曰四月三日兵撓湖婦女多被辱與驅殉節伊誰天水姝

任氏青龍任水監月山之孫以水監廕得官生二子一女至正中北人有楊姓者官于華亭因亂僑居任氏館舍楊卽爲其子聘任女其子嘗登牆窺所聘女任父兄皆惡之欲絕婚不可得遂遷延其期楊北歸乃以女復受某氏聘及親迎女遂剪髮而泣曰奈何以一身而有二夫吾將奉佛終身焉久之傳楊死或有以夫死爲勸者愈執不從後以女冠終

楊節婦龍華人至正丁丑夏彗星現天下童男女訛惑皆成配時楊年十三贅張都水子裕十五生一女十七裕蚤世楊守節五十餘年食淡茹素寢處一室里人呼其室爲楊節婦居

吳妙寧上海人年二十一贅同里張氏子越四載邑大姓以事變坐連其父寧泣曰吾父苟無地爲解族其赤矣吾不遑死禍延良人悔孰甚遂雉經死未克葬徵繫吏果至聞寧死喑異而去

胡氏姚某婦陳村人十八而嫁生兒未週歲夫歿族賂隣婦爲富家求婚婦抱兒泣曰不獲從夫地下有此兒耳尙乞生圖富貴邪族迫之婦度不能容乃乞歸父母亦憐其少如夫黨言婦以死自誓竟完其節

韓氏女父華亭豪姓女垂笄上海朱氏以禮聘之未行會婿翁坐死貲籍于官女父遂欲絕婚他適女知之蹙然易容曰彼雖翁死家籍婿在焉忍盛衰改操以事二姓乎父曰業絕之母多言祈母請迄不能回女黯然默泣積歲餘成疹而隕

諸氏華亭士人王子溫妻子溫性疎縱且居貧諸以女紅給其服膳丙申歲王與敬以兵焚劫松江溫欲挈婦逃難婦流涕曰事迫矣豈可以一婦人累而身邪第去我自爲

松江府志 卷之四十八 五
計子溫遂漣泣逋逃婦與隣嫗避于裏南城陋室中頃之
賊入隣嫗皆爲所污至婦婦怒罵曰吾父爲吏人皆稱其
廉平吾夫儒者我年倍于汝母等豈從汝賊求活邪賊掣
刃剖其腹曰且看母腹中何物腸胃盡出罵不絕口子溫
子章弟也

費氏元琇江陰知事朱道存妻都漕萬戶費雄女至正十
六年江陰亂依其父居松江之上海縣未幾縣陷苗軍復
大掠手刃以入將犯之氏怒叱曰吾貴家女何敢犯我投
釵珥于地賊攫之去旣苗沓至索貲無有遂驅迫就道氏
攀堂楹厲聲曰吾義不辱比遇害爪入楹木血沁于指

費氏元徽琇之妹歸華亭陶氏年三十喪夫將營夫墓泣
命兩其窶曰吾不卽死者以有舅姑弱女耳乃勤紡織以
給孝奉舅姑以及葬祭始終一節壽踰八十號爲費氏雙
節

葉妙真烏泥涇人歸于夏氏其翁病廢日侍湯藥滌垢穢
寒暑無間者七年旣沒負土成墳感動隣里時稱爲夏孝
婦

沈景新母及婦平江人至正中景新調上海吏江浙苗軍
來大肆殺掠母與婦謀曰我家素清白義不受辱果爲苗
軍所掠婦姑大罵苗先殺其姑縛婦髮馬尾曳殺之

謝氏泖上右族國初籍沒坐誅以婦給象奴婦給象奴曰
待祭亾夫乃從爾奴信之婦攜酒飯至武定橋哭奠賦詩
曰不忍將身配象奴自攜麥飯祭亾夫今朝武定橋頭死
一劍清風滿帝都遂自刎

楊氏華亭德門女洪武中妻里之王彥章五年夫亾年二
十四子端甫二歲氏誓不再適善養舅姑撫孤子及舅姑
歿子端甫亦蚤死端妻倪氏尤孝姑婦並守節育端子豫
補郡庠生勉勵其學正統初詔旌其門

孝行女沈氏名妙蘭未嫁母患心疾貧不能致醫剖脅剖
肝爲液進母食之遂愈永樂丙申旌表其門

俞氏名妙觀張文通妻高昌鄉俞眞昭女適張五載張病
瘵俞屏容飾勤侍湯藥色甚憂戚張病且革囑曰吾死矣
汝年少無子可寡居乎俞泣曰設有不幸從夫地下耳及
卒慟絕復甦至夕自經死舅姑族人具大棺同殮以終其
志時年二十有六正統三年旌爲貞烈之門

李夫人揚州通判劉遠明女歸上海主簿李從吉年二十
八夫死志不少二誨二女有法長妙貞贅唐文祥次妙堅
贅沈源仲二壻亦蚤世女年皆二十餘母女相依爲命撫
遺孤成立壽俱八十餘一時文士爲作三節傳及詩歌傳

於世墓在肇家浜北

俞氏淑安任仕中妻上海新江鄉人年二十而寡女二歲
男甫五月姑先夫卒舅宦遠方家貧無依氏斷髮自誓織
紉教子女適俞邦用邦用亦早喪勸其再適女曰再嫁誰
奉俞宗祀且辱吾母乃歸與母同居守制詔旌所居曰雙
節之門

倪妙真上海漢成里人幼敏慧父教以列女傳知大義及
笄贅孫思聰生子益五歲次倣甫暮而夫死時年二十五
哀毀骨立未幾父與弟及益繼死獨與母及幼子弟子綱
居甘艱苦以存二姓祀母壽終撫子姪成立人稱其節孝

云

湯節婦慧信上海龍華人性專敏讀孝經列女傳皆通大
義嫁華亭人鄧林洪武末林卒節婦年二十五一女七歲
鄧族利其居址迫使歸節婦曰我生死鄧家婦何歸鄧知
不可奪乃買居于巨室張婦泣曰我收夫骨於茲土與同
存亾奈何棄之欲自盡張義而去之既而曰彼利我財耳
乃盡以家貲還鄧躬織紉自給歲癸亥大水乙亥復水節
婦居荒野沮洳中時女適富林曹氏操舟來迎不許請暫
憇舟中亦不許曰我守此六十年縱沒溺以從汝安于地
下所甘心焉年九十三卒學士錢溥傳其事

金氏華亭金興一女年十九嫁同縣阮文亮五年而夫卒
誓不改嫁養舅姑撫孤子寡居四十年天順戊寅年七十
旌表其門

胡淑貞上海山宗海妻永樂十年宗海死氏年二十七孝
姑教子守節以壽終天順初知縣李紋奏爲貞節學士錢
溥誌其墓

唐淑清上海蔡倫妻夫亾時年二十四勵志守節奉舅姑
以孝聞育二子式堅式娶侯昱女淑潤爲妻壽卒遺腹子
經爲儒學生亦卒姑婦同心克全厥操鄉里稱爲雙節成
化丁亥詔旌表其門

宋壽貞華亭蕭塘人御史璪女嫁錢學士仲子岐岐通經
學古累舉不利壽貞亦讀書孝謹侍夫疾三載不懈及卒
棄其二女自縊衆媼救之復甦遂屏食卒年二十五詔旌
所居門曰貞烈從父主事宋瑛爲之傳

張璿妻胡氏字元善弟璣妻瞿氏字妙嫻珩妻楊氏字妙
賢皆年三十喪其夫同心守節成化己丑旌其門爲三節
胡氏以子駿貴封太孺人

尹氏母華亭人年二十夫亾守節不變教子成立管時敏
作尹母行以頌之

鄧節婦莫知其名見吳文定公集文定贈詩有一水纔知

節婦奇眼中覺得九峰低之句

張氏善才上海漢成里金復妻復二十三卒善才年與之同誓死不再嫁孝養舅姑以天年終撫六歲孤壽成立潔白五十餘年鄉族稱之

彭通妻某氏朱涇人通貧爲遞兵成化中卒妻乞貸易棺焚其骸歸而自縊知府王衡出俸金治葬自爲文祭之立石表墓

節婦某氏上海人既嫁夫患風癩不起舅姑恐子喪而婦去謀奪以妻少子婦覺密告其夫夫泣而遣之母家歸乃潛製喪歛衣衾夫既死父母不以告不闔棺露置水濱蓋俗忌惡疾然也婦聞盂飯滹雞借幼妹至棺所抱屍浴之斂衣衾闔棺設祭祭畢遂與妹訣卽以巾幕面投水死惜無能傳其姓氏者張汝弼傳其事

節婦郁淑貞上海人副使文博女嫁同里孔瑜瑜行商死於寇郁氏時年二十五不再嫁成化丙午知縣劉琬上狀弘治丙辰旌其門

李氏上海人景泰間嫁同縣沈璠年二十六而寡操守無玷弘治辛亥旌其門

陸氏名蓮上海周浦人父純母計氏嫁青龍鎮茅瓊瓊卒婦年二十九矢志不二生二子震霆家業凋落幾不能爲

生乃專屋靜居躬紡織奉舅姑撫二子言笑不聞雖隣里婦罕覲面弘治辛亥詔旌其門

趙氏京師人錦衣衛指揮讓女少保華亭張公瑩時爲都御史爲子昱聘之歸有日矣會瑩以憂去昱亦病卒遺書報讓令再嫁女艷然曰我聘於張卽張氏婦也又誰嫁且夫死將不有其家乎取救具悉焚之誓以必死及張還朝請婦禮見遂留不去居止常依姑姑衛夫人深禮之女亦盡其孝敬一日姑得危疾女奉湯藥退而涕泣謂侍者曰我所以生以有姑在姑死吾亦逝矣吾奩笥所有爾悉以與我共事者且密召其姊訣姑聞而大驚因慟哭出痰數

升疾遂愈公卿間爭欲委幣者且謂女未嘗事昱非再醮也少保公以爲然終弗能奪以兄臬之子爲後數年翁姑及臬相繼歿執節愈堅屏居一室撫子教之以奉昱祀郡守劉璇上其事詔旌其門

李氏華亭張瑞妻年二十六而寡守節三十年弘治丁巳冬下詔旌表

楊氏華亭張璠妻年二十八而寡守節三十二年弘治丁巳冬與李氏同受旌表

張氏華亭縣學生王惠妻惠有俊才卒氏年二十八誓死不嫁正德己巳旌其門

楊氏華亭人楊景春女嫁松江所軍餘黃鑾鑾亾守節不二志知縣張岐以聞正德辛未下詔旌表建坊北倉之左張氏楊玉山小妻南京人成化間玉山商於南都娶之婚踰月楊以婦妬辭歸張遂屏居自守楊亦數往來所贈以千計二十餘年楊以役累罄產赤貧婚嫁無策怏怏失明張聞之直造楊廬拜主母捧楊大慟乃悉出向所贈金珠具粧嫁其二女并爲二子納室留侍湯藥一年楊死守其柩不去旣免喪其父母強之不歸矢志以歿終身不見一人

顧氏華亭白沙鄉人生員顧倫女贅同里張匡爲壻夫死年方二十七遂營墓穴艱辛自守撫孤成立旣沒合葬平家灣父墓之側張弼請於有司爲建節婦橋于墓門并永其事

奚氏刑部郎中吳女嫁曹筠坪生子嗣榮筠坪課之嚴間被撻流血氏不諫止曰小兒輩墮家聲往往在于母之姑息嗣榮嘗夜歸筠坪怒跪之牀下夜半燭滅氏寢而覺呼之猶在地也嗣榮由是大慟力問學舉進士官虞衡郎封安人年七十五卒

康氏張掖妻督運遭疾卒于毗陵道中康年二十一懷遺腹越月子生荼苦萬狀撫育遺孤以衍宗祀嘉靖壬午郡

人刑部郎中周珮表其墓

曹氏干溪曹梅軒女適呂齊年二十七齊歿遺一女贅朱相爲壻生二子相卒呂氏時年二十五母女操作備極艱瘁後皆以壽終錢福爲作雙節傳

宋氏少叅宋愷女生而端凝父母鍾愛之見布政葉萱孫周聰慧能文遂許配焉周歿氏甫十七泣謂其母曰吾葉所聘也今遭不幸當適歸守制以俟死可也父母慮其年少多方開喻號慟彌甚不得已遂報葉葉仍行納徵禮卜日萱暨夫人並至與氏髻會拜畢隨更衰經迎周魂旌歸居總帳中凡四十六載卒嘉靖丙午與周合葬南賢村祖

塋之西郡縣交旌其門

侯權妻郁氏側室孫氏俱唐行鎮人二氏皆盛年喪夫無子截髮誓不改節紡績課其嗣子烈至成立裔孫侯萬鍾巴西鄉魁

徐氏祥澤里人年十七歸楊鉞爲贈給事中溥仲子弘治已未鉞以郡掾上官于役暑行暴卒旅舍氏方蓐產爲之隕絕會所產女又不舉溥議爲鉞立後氏堅辭撫其從子若孫若曾一一有恩而中丞公豫孫尤氏所鍾器十九婺居至八十三考終豫孫嘗謂氏于楊門爲貞婦爲壽母未得表旌言輒泣下沈愷志其墓

袁真真衛學生曹雲龍妻中所舍人清女其舅寢疾姑持刃入祠將割股救夫袁知之急趨泣告曰姑老且病不宜爲此卽攘刃自割股肉和棗湯以進舅病遂愈

莊氏華亭人適市人張雲鵬以孝敬聞雲鵬病瘵漸憊氏周旋湯藥晝夜勿懈雲鵬卒氏年二十哀慟幾絕念寡姑無倚躬紡織以奉養殮旣葬雲鵬命兩其竈以示決守志五十年孫文簡爲立傳

彭氏右所千戶陳童妻童亾時彭甫笄撫孤子琮長襲職琮謫戍塞外彭偕其妻繆從行琮逃歸繆棄兒他適彭孑然傭給撫守兩期孤孫天順改元赦還琮亦復職未幾

卒子輔襲卽彭所撫塞外孫也輔亦蚤世復撫孫某天惟琮繼室幼兒弼在彭又育底于承襲年八十餘卒

劉氏千戶張綱妻也竇氏百戶張敏妻也陳氏軍人劉熙妻也皆年二十餘而寡無子苦節食貧皆七十餘歲終貞操凜然並稱于時衛人作三節婦歌誦之

孟氏王廉妻年二十六歲而寡時姑且未老子方五歲孟孝養終身教其子宸成立補衛庠生會宸亦卒苦節愈勵又十餘年卒

孫氏鶚之女歸嘉定沈思道思道屬纊時誓相從地下及就木孫引刃自刎不得死家人日夕守之潛吞鍼服毒百

計自殘踰年竟自經死嘉靖九年詔旌其門

周氏蔡應奎妻青浦人夫坐罪卒家貧無倚其姑強之再適因抱女投河死

李氏練塘名家女既笄歸小蒸庠生沈默甫三月夫死繼姑逼之再適備加楚毒一夕沐浴取衣百結自縊與夫合葬曹墳東

楊氏父啓東曹涇里巨族也池州守包公鼎之子志從嘉興贅于楊因家焉生子節方五歲孝二歲志亾氏督二子甚嚴每損一衣一器輒誡以懲曰少不知戢長益誕肆二子感奮力學迨有室每夜二婦力女紅侍立不敢坐候二

子課竟始入內以爲常節應試遣老僕隨行中鄉榜歸老僕云同榜曾邀之于平康里毋聞之流涕覆面先責而後拜焉後相繼成進士訓曰守身義養粗糲亦甘饗設敗官牲偶爲惡二子服官廉慎一時徵入爲南北御史負直聲節後忤楚闖戍莊浪衛孝劾嚴分宜請告養母年七十二卒節奉嚴旨不得歸行服服斬衰九年

張氏陳嗣陸妻潘蕩里人年二十一夫亾舉遺腹子孝中年子又天與媳吳氏同撫孤孫濟良壽八十四

吳氏御史馮恩母恩上疏論劾冢宰汪鋐逮詔獄訛言洵洵欲籍其家家人奔竄氏絜孫行可入京瀝血爲疏奏曰

林江府志 卷之四十一
兒慙無狀萬有餘罪但妾臨年不忍見子被戮願身贖孤
以延嗣息事雖不報而行可卒申其說未減戍雷先是恩
考績封吳太孺人以壽終

張氏莫隱妻年十九歸隱踰年隱病卒氏悲不自勝俗焚
死者故衣遽投烈焰掖之出復以身蔽棺計必殉遂屏粒
父母姑舅慰之第應諾強之飲藥悲咽不出語比進食亦
然家人知其終無易志不復強旬日五內毀裂噫氣不屬
竟立棺側死隱從叔如忠紀其事奉旨旌表

陳氏沈槐妻棗村浜人未嫁夫亾欲往奠父母阻之竟自
縊死

封氏王相王桓之母二十九夫病革指孤囑氏而沒氏哀
痛數絕勤劬鞠育延師課誦時門戶單弱憂患備至自弘
治己未迄嘉靖秉操二十餘年知府史直臣旌之曰貞育
孫文簡公曰貞以存節育以撫孤天地仁義之氣備于婦
道矣爲歌詠之一時屬和有貞育篇行世

陳氏年十七適邢應鳳生二女夫亾堅志守節二弟素無
行見氏年少欲奪其節氏以死自誓後潛受海上某姓聘
以母病給之歸省夜泊舟浦口始進簪珥請易吉氏號慟
不從二弟隨發所伏輿火欲劫之行氏度不可脫佯爲溫
語曰事旣爾無可奈何但未育婦載適人翁姑子女俱不

聞者若輩能往白吾姑一訣乃可給之去氏隨抱所生幼女躍入黃浦事聞郡侯臧繼芳憐其奇節抵二弟罪表其門所生長女喪父時年甫十歲朝夕悲哀凡二載哭不絕聲而卒瞑目時猶痛呼數十聲而逝及焚其骸則胸次俱血淤腸胃俱潰裂見者無不流涕黃門袁世榮傳其事宋氏字子羽禮部郎中何良傅婦也良傅素羸疾氏日持誦楞伽所祐之嘉靖戊子秋試良傅暈且死氏泣不食私欲自經保母曰夫未屬續何至是會疾漸瘳至癸巳病復作親侍湯藥忽一日暴絕氏謂不復起卽縊於誦經室中已而良傅復甦竟不死哭之曰哀哉子羽而欲就吾泉下乃我又將何就焉終身不復娶

龔氏青浦富欽妻欽死守節撫孤嘉靖戊戌子赴京具疏詔旌其閭

姚氏庠生顧雲龍妻年二十三守節勤苦操家無大故不出闕閩事庶姑以孝聞壽八十一嘉靖壬辰旌表

任氏華亭人參政勉之孫女嫁張景年十九寡撫遺腹子思成立清操無玷嘉靖癸卯詔旌其門

王氏金山衛舍人黃裳妻夫亾年二十二苦守清節後四十年嘉靖癸卯詔旌其門

蔡氏生員沈露妻露死蔡方二十六歲求死者數四念姑

老一子在抱強起奉姑撫幼辛勤四十年巡按尚維持上其事詔旌其門曰貞節

姚氏華亭人贈吏部主事盛斌妻二十八歲夫亾家貧子幼伶仃孤苦維績朝夕課業辛勤嘉靖乙丑子當時成進士封安人疏母苦節得旨旌表享年八十

談氏嚴泰妻泰客死婦年十九無子而貧飲苦茹淡以養舅姑五十餘年未嘗見齒宗黨欲請旌之婦堅辭曰始願不及此盡我心耳

鄒氏青龍鎮人年十六歸何文祥甫半載夫逝有遺腹越五月生氏口斷臍帶誓曰此生少負所天有如此帶遂食

蔬茹素艱苦備嘗沒身無怨

唐氏上海杜時官妻時官少服賈抱病將卒氏年二十三無子有老姑時官命之曰伯氏有子宗彝立爲後以養其姑後賈事廢家日就貧遇歲大祲者三氏操愈勵年五十餘宋子南華傳其事士大夫歌詠之題曰楓閨白壁後以子貴敕贈孺人

王氏妙貞莊銓妻也婚五年銓死遺孤世忠三歲舅姑欲奪其志王氏抱世忠泣曰陰瑜妻以屍還陰尙病其不早決我當死莊氏尸內卒不爲奪嘉靖戊申巡按饒天民廉得其實與顧嶽妻秦氏曹雷妻陳氏山禧妻某氏並奏于

朝值倭變議未下詳潘恭定恩所著傳中

陳氏吳鑑妻年二十三夫亾遺孤一週撫之成立孝養舅姑孀居五十七載邑令俞思冲題貞壽以旌之

張氏華亭人工部烈之姊年十七歸憲副富好禮仲子于德于德以父歿哀毀成疾不起時氏年僅二十家務倥傯里役旁午更屬倭警氏撐持拮据備歷艱辛生一女贅孝廉郁伯純爲壻撫姪孫永祚爲嗣邑令俞思冲表揚之

瞿氏胡汝任妻太守憲孫女時有倭難與賊遇瞿慮不免從衆中奮擲道傍河中婢挽之不起竟溺死

張氏文學韓洪謨妻甲寅倭攻郡城入其家洪謨具儒衣

冠擊曲迎之欲勸以好生勿殺語未脫口刀斷其脅矣氏號赴被執俱死焉越二日里中收殮見氏左膊已受三刃尚堅執下體衣不解也是時東郭有陸野塘者其妻亦不屈節死故人爲之咏曰青血流天地丹心照古今野塘巖下士一日遂知名

陶氏南門四十保民應奎女貧未嫁倭至與其母奔避賊及之遂沉于河母挽之出答曰見不能顧父母遂入深淵死其隣女張氏爲桶匠張經女聞陶死嘆曰嗟乎得死所寇入其家亦投河死焉

王氏夏文學世勳妻居葉謝鎮甲寅夏寇經鎮夫婦奉其

松江府志 卷之四十八 十九
母偕弟妹同載而逃賊邀之于浦氏語其小姑曰我兩人
義不可辱挽袂而投于河世勳與弟皆遇害

趙氏泗涇居民李之葉妻甲寅五月寇至家人逃散氏獨
南走抵官涇橋賊追之度不免赴水水淺不死賊褫衣逼
焉氏瞋目大罵死

張氏浦南化成菴居民譚三妻甲寅四月避賊出奔賊追
及欲淫之執不從受刃于水涯之間

浦南朱氏二女文學明輔妹寇臨境父兄挈之逃抵瓜涇
塘爲賊追迫與婢秋香連結投河死越三日父獲三屍于
沙岡口顏色如生秋香張姓

焦氏文學朱煥妻居浦南與家人避寇至黃浦賊追及煥
獨扶其母逸焦被執與子婦唐氏相率投河賊怒亂刃死
焉二子懋信懋謙亦死

張氏婦泗涇人寇至其夫張仲珍逃之氏爲賊得不辱而
死

陸氏婦七寶鎮居民陸台蘭妻賊至出奔爲所逼投橋下
死

三烈女俱上海人其一包氏其二不知其姓蓋包婢云包
字千錢年二十許容甚韶麗值倭難家人奔竄遺三女在
後寇追及之相去百武許包氏先赴水二女從之浮沈間

寇倒長戈授包溫言論之起包不顧自擲深處寇以戈刺之二女子爭以身捍俱被重創死

王氏何四妻葉村洪民琴童女嘉靖中被倭俘掠義不受汚爲賊刃于河越三日父母收其屍兩手猶堅握衣帶

倪氏高橋倪甫爵女倭寇上海女同嫂奔竄猝與寇值女見嫂被執投水自盡

高氏譚應禮妻住華亭十保倭突至洋涇執氏并二僕婦欲汚之高氏罵不絕口遂被害斷其四肢二僕婦亦赴水死事聞奉旨旌表高氏貞烈之門

羅氏劉大章妻倭破青村被擒投河身死後娶陳氏生男

希運父病割股母病又割股俱獲痊其孫國翰亦割股療祖病知縣俞思冲以烈孝旌其門

褚氏十五保楊子安妻倭難作子安率義旅捍蔽死之氏曰夫以義死妾豈以不義生收屍殯葬苦節終身年七十六郡縣旌其閭

徐氏七寶鎮陸猷妻年二十猷死未及葬會倭掠七寶縱火焚廬舍氏拊膺哀悼欲投火自焚父掖止之已乘間收骸骨囊枕中持枕以行雖踉蹌避難未嘗去手倭退歸葬終身守節

鄭氏年十七歸邑庠生姜從謙姜天氏年二十七斷髮毀

容屏處一室紡織以給薪水值歲稔姑乏送終微諷改節
氏悲惋就縊救解復甦遂守節至老嘉靖間郡邑表其閭
顧氏李賓陽妻上海顧定芳女歸李三載夫亾越四月舉
遺腹子泣曰夫有後可死矣遂以遺孤托兄從禮絕粒死
年二十一督學趙鏜邑令喻顯科旌其門

沈氏布政使沈恩女歸庠生顧從仁二十五夫亾守節值
倭變亂離播遷備嘗艱苦子九敘甫孩氏撫字至成立年
五十壽終督學耿公旌其門

趙氏秦環妻環少嬰孱疾趙時年二十二環疾革囑其兄
璽曰婦少無子我死只作一壙趙聞之欲先夫死闔戶自
縊家人驚救遂截髮見志環死環兄璽尋卒妻張氏亦年
少與趙同誓死守兩婦熒然始終一節耿督學定向邵巡
按陞旌其門曰貞節後二十餘年族人秦總女嫁進士潘
伯翀亦早寡以苦節死監司交旌其廬

沈氏太守瞿霆孫繼武妻二十一而寡家貧無子孝事後
姑苦節五十五年督學耿定向旌之

汪氏青村所人嫁金山衛庠生李泮倭寇入城泮拒敵陣
亾給葬優恤氏年二十八撫孤守節者三十六年院道旌
之

陸氏上海人贅華亭徐從教爲妻從教避倭吳興鬱鬱不

得志時有子益孫少敏撫而嘆久之嘗咏一絕句悲愴婉切一日趣客與談若訣者客去面壁西向而逝氏上奉孀姑攜十歲孤與喪歸里葬訖歸女與彭太學汝讓嚴課益孫子壻皆成大名守節七十六年卒大學士王錫爵爲文祭之

周氏張天恩妻十九喪夫無子值倭亂族衆奔竄氏日夜號泣不去乃撤屋板棺殮權厝室中皆手自經營又躬紡織爲夫營葬一生未嘗解衣而寢卽族子亦罕見其面年九十六端坐而逝

貞女姚氏孝廉簣仲女也年十二受黃籌幼子聘未幾子

天父母欲更許氏誓不更二姓有強委禽者氏聞卽持刀自刎衆救止之至訟之官太守方廉司理吳時來嘆曰此松郡間氣我輩扶植節義可令其改志邪自是獨扃一室持齋事佛以終身焉

尹氏贈文淵閣大學士徐緒妻性嚴毅不苟言笑年三十一緒亾子思誠方六歲會遭倭變流離避難者四年寇平收合餘燼延名師訓子萬曆己亥按院徐元特旌其閭享年八十孫光啓嘗曰藉六七十年中無王母徐其泯矣後追贈一品夫人

唐氏大參本堯女適太史陳懿德子允正舉一子允正卒

松江府志 卷之四十八
二十三
踰年子復死會太史亦卒氏請于父自營壙事竣忽沐浴更衣戒女奴曰吾困少憇命之出鍵戶書後事畢遂自縊啓篋中凡含殮旌襚歲月製者罔不豫備衣帶間書夫婦同墓四字萬曆朝建坊旌表

節 金氏張問仁妻夫卒金年少毀容自矢煢煢撫孤白首一

貞女林氏訓導志女甫期歲受沈懋賢聘沈年十四殤氏時在父任聞訃欲自盡父母日夕防之遂剪髮決誓及沈殯必欲往送父率以至撫棺號慟不復還家孝事舅姑人罕覩其面年四十卒隆慶五年知縣張燭題貞孝烈女以

旌之

孺人黃氏楊允繩妻允繩以給事中論劾大官丞姦蠹下獄論死是時氏與子應祈質一室委巷中日夜擘紵絮衣橐餽五年如一日應祈當有室不肖室氏泣謂曰汝父長繫若且煢煢不爲一綫計強之室甫孕應祈憂憤餓死舉子又踰月允繩死西市氏乃強力攜其婦及扶二櫬歸渡江邁風浪禦宵警神色不小懾及家家坐久繫危廢氏料理之襄二喪教其孤孫忠裕莊皇帝恤錄命下氏屏居又數載卒年六十九

陳氏華亭葉灼妻二十四夫亾冰霜自矢夜閉戶必巡視

而後卽安所居幾五十年未嘗遷坐爲夫營墓至七十六而沒氏手植橘一株每遇亾忌摘實薦新歲無缺供氏歿橘亦隨稿王文肅錫爵手書貞節表之

翁靜簡指揮使國衡姪女年九歲父患危症女扃戶向大士拜禱剗左股一瓣授母黃氏煮羹奉父父病尋愈衛人士欲上其事女辭之父卒後嫁西嘉瑞甫半載母疾復割股以進母古來割股未有救父復救母若翁孝女者

楊氏華亭人適張雲漢夫亾氏年二十四子齊羽甫一歲守節二十五年齊羽復天婦陳氏年二十六遺孤賓臣甫三歲教之有成姑婦飲冰白首秉操稱雙節云

張氏青浦曹氏妻年十五適祺越四年夫亾子甫三歲誓不載嫁奉姑孀居六十年壽八十一吳門袁洪愈傳其事葉氏華亭人年二十適陳軒軒侍父肄業胄監卒于京氏年二十七聞訃卽毀容截髮屏去膏沐孝事舅姑撫孤成立卒年七十六

李氏適浦南陳怡怡亾氏年二十六一子琬在襁褓母子伶仃孤苦守節五十八年壽八十四

談氏推官承儒女承儒無子贅張伯深爲壻年二十二伯深死舅姑授以產遜與伯叔及父卒于官遺田數畝族人奪之遂晝夜紡績以給饗殮年六十四督學巡按下檄旌

之

金氏葛佃妻年二十喪夫矢志不二撫孤成立萬曆九年奉旨旌表

胡氏華亭北俞塘人年十七嫁高恕越四年恕卒有一子一女孤復天舅姑奪之百端氏益自奮舅姑歿嫁其女婿又歿母女遂依外孫女之夫家轉徙流離矢志如故萬曆六年郡邑旌其門年八十終啓恕窀合窆距造生壙日適六十年

曹氏府庠生黃文衡妻文衡亾氏年二十九藐孤一曾甫九齡氏殯夫課子備極酸辛一曾入庠有才名爲知府許維新器重許擢任行一曾送之風雨之夕溺于富林東潭氏越三月殂士林莫不悲之守節五十六年按院馬從聘旌其門

楊雲芳時宜之女許字府學生唐之駿子尋天雲芳卽持齋勵志自矢無二居三年父母憐其幼復議婚委禽之夕扃戶自縊遂穿唐穴合窆焉墓生連理枝

沈氏華亭人董繼資妻十九而字二十六而寡生子賓大甫三歲伯氏蚤亾四顧無依氏茹荼飲藥力作機杼以教子子旣遊庠氏懔然曰以而藐孤能自存活吾二十年之志可從於地下矣竟不食而死

朱氏貞晦先生克裕女吳稽妻稽年三十天子炯甫六齡
矢節自守負土成塚屬兵掠歲侵二鬴不給戚屬交諷之
氏且憤且慟幾欲刻面自毀力織以給姑養課子炯成進
士年六十直指上其事得旨旌閭後贈太恭人
何氏楊允修妻未婚夫亡氏年十七在室聞變卽斷髮毀
容絕粒誓死後往奠夫家隨于柩前扃門守制不還凡三
十六年萬曆癸酉下詔旌表建坊于莊老橋南

聶氏戚應貞女幼育于聶因氏焉許字里人韓宗義隆慶
元年冬訛傳選宮女未笄而歸韓時宗義有疾令獨處甫
半載宗義歿氏年十七家貧無嗣力苦事姑誓死不二卒
時年幾七旬矣巡按薛公貞上其事詔建坊

包氏贈公志女早喪父奉母楊太孺人家教惟謹嫁唐自
道生三子二女年二十七而寡冰操酷似其母有兄節孝
兩侍御之風長子世材恂恂篤行生平不知有欺僞事自
號無懷萬曆壬辰氏壽九十及見孫之屏成進士明年癸
巳卒

張氏贈大理少卿宋堯俞妻堯俞舉于鄉萬曆丁丑客燕
旅亾訃至氏慟殞屢絕時幼子懋澄方九歲誨導甚嚴惡
衣敝食惟恐少過廉知嬉游必加櫛楚略不假借澄幼卽
好持論嘗戒之曰余聞之夫子不德而辨禍必及焉今豎

子未閑明德而擅訛古人禍之招也持此立心則刻處世則隘刻必得罪于天隘必得罪于人吾不知所終矣懋澄奉慈訓卒以成名萬曆庚申奉旨建貞節坊於米市里本朝順治十五年以孫徵輿貴誥贈淑人

李氏工部昭祥女嫁方伯莫如忠第六子是卿婚甫一載卿沒氏年十八守節六十一年前壬申寡以後壬申終一生苦節未經旌表里中惜之

尹氏年十八歸陳鳴韶鳴韶早世氏年二十三生子善道甫六歲力作奉舅姑挑燈課子舅沒家益落奉其姑共依棲外家敬事不衰善道後舉戊子鄉魁上狀於朝旌其門

姚氏舉人姚臣女舉人張德瑜妻二十四喪夫齧棺慟絕以親老孤幼銜哀忍死及舅姑歿屢營喪墓荼苦萬端太守李多見稱其守志三十八年妻道婦道母道兼備焉萬曆丙午巡按馬從聘具題奉旨旌表三子以誥以誠舉于鄉以訥見獨行傳以訥妻翁氏事姑孝謹拮据持家咸有禮法撫育諸子後皆有文望里中稱賢母云以子安豫貴贈太宜人

陸氏中丞樹德女范允謙妻謙蚤世撫孤必溶補諸生性剛介操家凜凜者四十餘年題請奉旨旌表

華亭李氏贈都察院司務吳聘甫妻刑部郎中敏孝母夫

松江府志 卷之四十八
二十八
亾時年二十八敏孝甫半暮孝養翁姑訓子登科守節四十餘年歿壽六十八萬曆年間奏題奉詔建坊旌表

沈氏泖濱人令尹古浦之妹張甲之妻夫亡年二十寡居四十載以貞節旌吳石湖稷爲之傳

范氏青浦庠生徐伸妻年二十七伸死撫育四歲孤士衡拮据佐讀補庠生孀居四十六年萬曆庚申奉詔旌表

黃氏金山衛指揮使西昌言之妻承勳之母二十六而夫亡堅志苦節備極慈孝孀居七十載壽九十五而終

黃氏生員黃軒女許配青浦人陳講爲養婦未婚講天歿氏誓以死守孀居三十年卒

蘇氏華亭人御史恩孫女嫁庠生沈胤嘉年二十七病卒氏亦齊年遺孤承歆甫六歲育養成立爲府庠生萬曆三十三年承歆復卒又撫育諸孫爲庠生者二人卒年七十八歲孀居五十二年知縣張繼桂知府許維新俱旌表其間焉

夏氏方伯公寅女孫適郡庠生姜如岡甫二載卒氏年十九事舅姑撫遺息拮据五十三年卒直指邢侗旌之

陸氏上海廩生陳無逸妻潘蕩里人陳卒氏年二十三子世蕃尙襁褓訓其成童補諸生復天守節五十六年勤苦孀居白首一節邑令屠隆旌之有節並共姜賢同孟母之

褒

劉氏年十七適漕涇楊舜卿居六年舜卿早世無子氏卽
雉經別室營救獲生益自刻勵矢志靡他時媵婢陸氏亦
新寡感主母苦節共守相依六十年八十四卒卒之日婢
亦號慟隨亡遠近咸異焉郡守許公高其義爲置後選立
姪孫應聘奉祀旌其門曰節壽雙全云

林氏郡丞恕女端靜穎異通諸書義能屬文年二十受楊
道立聘楊卒氏毀容食蔬截髮自誓父兄泣勸之輒引古
節義事侃侃置對卒不能奪莫公如忠傳其事謂氏守節
三十餘年晚生髭鬚里中稱女丈夫云兄林士博以事鳴
於郡邑遂旌其廬有勸貞錄行于世

沈氏鴻臚李人麟繼室錢修撰福之外孫女也少卽莊嚴
諸姊無敢以褻見及笄歸李生子耆卿甫四齡鴻臚捐館
氏一志訓子萬曆間前室子構禍貽累家立碎氏流徙顛
沛而勤苦操作課子益嚴後耆卿以才行稱由選僑登丁
酉賢書氏已先歿年僅四旬未及疏請朝旌

朱氏邑諸生伯縉之女十五歸陳治坊舉一女將暮而夫
歿氏年十七未幾女亦死舅令氏乳側室趙子爲子及舅
死所乳子無行領家喪身氏益無倚惟二三婢執爨一童
應門夫黨暮功非歲時不得見里閭稱爲貞節婦云

張氏沈斌山妻夫歿年二十四哀號絕粒屢欲捐殉翁姑力解乃止子女駿亦早逝遺孫天禧撫養教誨每篝燈課誦貧苦守節孝事舅姑聲不聞戶外者六十年卒年八十四

貞女袁氏元徵女生三月受聶士濂聘未婚聶天氏堅守制父不能奪比姑病侍湯藥三月姑亡姻戚勸其他適秉志愈堅卒全其操士論稱之

顧氏青浦錢雲川妻夫死抱其胤子若珍成立為娶婦謝氏若珍復天婦姑相守謝先以節殉顧獨身禮佛矢節終終士大夫顏其姑曰冰玉菴

姚氏大理寺丞馮恩第七子衍可妻年二十而寡守節五十年教其子大登入太學以孝友稱又訓其孫鼎位克紹家修後以明經為翰林待詔年七十五卒其婢繆氏幼侍衍可年甫十三誓不肯嫁依姚守貞年亦至七十二臺使並旌獎之歲給粟帛姚氏與張德瑜妻姊妹也人又稱姚氏雙節

沈氏嘉興太僕卿玄華女歸錦衣徐有慶孝事朱氏姑而待妾梁氏最有恩梁氏生子本高有慶卒氏方盛年卻屏一室專靜寂處年踰六十卒後本高上疏兩母得並旌董宗伯題其坊曰相門雙節



松江府志 卷之四十一
曹氏副使定菴女孫舉人莫是元幼男後景婦年十四父母俱亡是元收爲養媳奉侍太姑經六年飲食與俱言笑不苟方擬成婚後景病故女卽絕粒飲泣月餘而卒巡按何熊祥表其門口閨秀奇節
康氏李九星妻從翁宦遠方翁卒于官南還道出彭蠡湖夜半狂風撼舟幾裂氏驚起失足墮水姑急呼漁人援出之氏泣告姑曰兒夙承母訓言不出閨今乃假手漁人乎兒不願偷生以辱夫子絕粒者三日及抵故里甫入閣未半晷以自經報矣時萬曆甲辰九月三日年二十有一季水馮夢禎爲之傳

侯氏華亭人胡體晉妻婚甫一載夫逝有遺腹子會有欲奪其志者乃給母出杜門自縊年二十二貧不能塋里中人士醵錢助之

金氏青浦人呂克忠妻嫁甫彌月克忠死屢欲自經爲姑所阻於是蓬首垢面棄牀褥不寢或竟日不餐未幾卒

顧氏萬里女幼受秦氏聘未娶病亡女立志守節父母強逼改嫁自縊死知縣鮑公奇謨旌其墓

曹氏南橋里人八歲許字薛繼愷年十九待嫁愷死氏哭踊幾絕毀奩焚統綺擲樓而墮所親勸諭之氏曰若不容吾死惟終身死守以無負薛耳愷父往候氏慟哭出拜舅

以誓靡他。有以庚帖請者，氏聞竟絕粒死。薛遂以禮迎，氏
柩與燈合葬北郊外庵山之西。

楊氏庠生李光初妻，年二十五生子僅襁褓。光初病卒，當
蓋棺時，斷一指投其中，曰：「先割吾指以誓，從夫于地下。姑
留我身以撫孤子，將來及葬夫後，悲哀骨立，不能飲食而
亡。」青浦令王思任表其廬，曰：「斷指奇節。」

陳氏庠生張士震繼妻，歸張僅歲餘，張病不起。氏誓殉，嚴
防之，促爲夫入土，砌磚龕于柩側，朝夕依焉。後絕粒二十
餘日而卒。時丁未四月廿一日，葬于山，知府張九德題其
墓曰：「女中彝齊，建祠學宮東偏，春秋祀焉。」

許氏許初女，贅嚴爲婿。嚴飲博不治，生餓居西湖庄之僻
隅，諸惡少聚而進，曰：「而婦顏艾曷不令共我輩歡？」日可得
青蚨治酒，張博嚴卽以意誨婦。婦叱之，屢被箠楚，不從一
日。諸惡少以壺豆進，婦避之。隣媪家泣，顧懷中女，曰：「而父
不才，吾又安能覩顏存喘息，俟女成也。」少間聞闔戶聲，媪
往覘之，婦拔刀刎頸仆地矣。媪驚呼，隣報初，初挈醫來視，
取熟雞皮封之，復抓去，明日氣絕。萬曆壬寅二月八日也。
年二十五，知縣俞思冲捐俸殯殮，殮知府許維新旌其門，曰
貞烈。命葬于黃耳祠側，今並祀陳節婦祠。

楊氏青浦人，受唐嘉會聘，年十九未嫁。夫亡，父母欲改適。

擇吉受聘氏聞深夜自縊時萬曆癸丑十二月初七日奉
詔旌表今與陳許並祀稱三烈祠

蘇香上海田家女年十九其父森受盛萬年聘萬年從軍
未便歸娶俄聞戰敗香方織投杼嘆曰寧能獨全邪遂飲
泣不食顧影語曰若能殉死我豈戀生父母慰諭載三乃
強食已知凶問投繯死其家以萬年衣冠合葬于斜橋左
督學駱駿曾旌其閭

顧氏華亭陳愷妻二十夫亡生一女翁惜其貧苦奪志不
從往依其父父意亦如翁氏悲憤不勝乃嘆曰予無所歸
矣祀其夫慟哭至夜半乳其女投繯而死

盛氏堯崙女為陸懋廉妻陸素有瘵症娶甫八十日而卒
後姑輒謀嫁之不得已歸避父家居無何或告盛曰若姑
受某聘將去汝矣盛泣雨下入簡曆自誦云今日是重喪
死則不利生者紉履至雞鳴雉經于室有司旌其閭曰儒
門貞烈

金氏文學應登女字于徐徐富家以淫僻敗業父欲絕婚
女不忍寒盟乃館為贅壻後益蕩投身勢宦意揚揚歸妻
方詰之而豪僕十數輩忽昇輿至學皇駭思脫女已闔戶
經矣

陸氏邑庠生喬懋績妻二十七夫故以姑存強食承歡姑



歿殯葬之費氏皆出自力作年六十二卒

陸氏華亭人徐正禮妻夫亡氏年二十九盡力營葬守節四十七年子昌貽成立爲諸生天啓三年奉旨旌表

劉氏顧可大妻廣西按察副使國縉之母蚤年孀居事姑教子六十壽終天啓三年奉旨建坊

唐氏何三德妻年三十夫亡長子萬化十歲次子萬仞八歲仞伶無倚氏矢志存孤訓其成立萬化舉天啓壬戌進士疏母節以聞甲子特詔旌表後萬化爲福建提學副使進封太恭人壽八十卒萬仞妻李氏年二十九夫亡自投于河姑覺而救之勸其忍死遂同姑苦節年五十先卒崇

禎乙亥巡按上其事詔建雙節坊于北倉橋北

王氏封君煒女張永鑑妻夫故氏年二十痛夫夭折毀容矢志守節四十餘年崇禎元年奉旨旌表

葛氏郡文學張積基妻年十九歸基兩載夫亡泣誓守貞撫一歲孤天彝艱苦萬狀卒能成立鄉族重之見汪太常慶百傳

蘇氏華亭人歸徐奉常甫舉一子奉常卒氏撫孤成立婚娶有二孫無何子婦相繼天遺孤在襁褓躬親教養稍有不率輒痛哭訓戒孀居四十年足未嘗履戶外郡邑議旌氏堅卻曰老嫗自守其素節何足上煩官府邪

張氏庠生重熙女適泗涇李茂叔早世氏年二十三苦志寡守父母強之他適剪髮自矢蔬食終身撫二女年六十病亡

王氏名鳳嫻字瑞卿自號文如子宜春知縣張本嘉妻靜婉工文墨有詩名著焚餘草三集行世封孺人女引兀字文姝引慶字媚姝並能詩有貫珠集

宋氏華亭蕭塘人沈文炤妻少讀書晰大體年二十歸文炤文炤食貧力學氏脫簪珥佐讀甫三載文炤亡遺孤五月誓以死守紡績徹夜翁姑憐之謀奪其志氏手書告母曰蓋聞臣之事君有死無二婦之從夫終身不改此人之

大倫女之大節也女蒙父母擇配沈君可謂得人豈意遽然一疾天促其算幸已生兒撫令成大終身所倚此素志也倘必欲見奪寧蹈東海而死耳有何面目見沈君子地下乎自是翁姑父母不敢復言孤名泓親自督課既長有文望氏成疾泓進藥輒麾去曰此我見汝父時也何以生爲益感泣月餘死年五十四孀居三十二載崇禎六年下詔旌表立完節坊泓後成進士以純孝稱

施氏吳縣人贈大理少卿宋懋澄繼室事姑張太淑人以孝聞姑亡懋澄方試北雍擗踊含殮克如禮懋澄歸泣曰使我無附身附棺之憾者婦之力也懋澄沒時年未三十

遺二子徵岳徵輿皆四歲徵輿生母張淑人教顧嚴切氏
獨濟以慈惠鞠愛有加及二子壯有室率婦廟見喜曰吾
爲婦事先姑九年未嘗見啓齒吾間請先姑曰汝我幸自
寬所不笑者以嫠也吾嘗心識之今日得爲姑見兩婦吾
無負先姑矣一日無疾而卒

楊氏太學諸秉禮妻秉禮沒子鶴年僅二齡氏年二十一
撫孤成立備歷艱苦壽七十三知縣屠隆旌之孫嗣郢

本朝順治辛丑進士

王氏太子太傅左都督徐本高妻太倉大學士文肅公錫
爵女孫編修衡女也性敏毅嗜書史能明大義嘗榜其內

齋云金閨文作市玉匣氣成虹以見志從本高官京師一
切章奏文牒咸經手裁遇節烈事必擊節相勗天啓中逆
奄秉政金吾競奔其門有欲于馴象所建生祠者氏聞之
謂本高曰此真冰山也不可遂以地隘拒之奄怒削職罷
歸怡然就道崇禎初召本高還掌鎮撫司印管街道廳晉
太子太傅左都督氏封一品夫人所得俸薪輒勸本高散
贍族人曰同爲祖宗之裔我家以寡子襲職邀榮何可不
使長幼諸從輩均被皇恩也自是歲以爲常年四十六卒
金氏新昌令時揚女年十八歸舉人顧之璿子文學允升
年二十一允升卒勵志荼苦守節四十年有司旌其門

張氏儒生鄒承恩妻年十九婚未及朞而寡守節五十八年丁丑巡按路振飛旌其門

孟氏陸應昌妻孝子陸國禎母夫亡守節四十二年有冰霜之操巡按王志舉特旌其門

諸氏庠生陸旭菘妻旭菘蚤喪氏事寡姑最孝食貧教子砥節終身崇禎己卯有司旌其門

貞女俞氏青浦金澤人吳江許存仁未婚繼室存仁亾氏年十九截髮毀容歸養舅姑恩撫前妻之子成立六十二歲崇禎己卯奉旨建坊旌表

王氏太僕寺寺丞徐琰妻守節四十五年王氏諸生徐文孫妻守節四十八年巡按任濬並旌其門

錢氏年十八適周自銘二十一而寡遺孤六月子影靡依乃就祖姑村居力勤茹苦崇禎庚辰壽八十卒巡按任濬旌其門

杜氏上海張寵繼室孀居三十餘年撫視前妻二子若已出拮据婚嫁並竭心力季子夢鼎娶劉氏事姑盡孝又常割股肉療夫疾兩世貞孝人咸稱之崇禎間有司旌其門

楊氏張亮臣妻生一子亮臣病歿氏誓以身殉及遺腹生男乳之至服闋卽托孤親族竟自縊死

俞氏張澤人幼受徐孝思之聘年十三孝思歿哀號數絕

遂長齋縞素父母僅一女欲奪其志氏聞之飲溲自戕獲
救一夕又投繯驚覺得不死舅姑閱其志乃迎歸氏誠孝
克盡婦道有姊嫠居卽撫弟子爲嗣年四十二卒
顧氏馬鳴仲妻值海上亂有掠之者不辱死三日就殮顏
色如生郡邑並旌之

陶氏上海楊日就妻年二十二夫亾子履泰方在襁褓毀
容茹苦教子爲時名醫崇禎未有司旌其閭

本朝順治十七年奉 詔建坊

陳氏上海包文煥妻年二十九歲夫亾連遭荒歉力勤紡
績孝事病姑苦節四十餘年卒

本朝順治四年巡按旌其門

馬氏文學喬軫妻年二十二夫亾守節七十四歲卒至

本朝順治十年巡按泰世禎疏奏下 詔旌其門

貞女周氏上海周鼎臣女許聘朱孔暘爲室未婚孔暘歿

氏年十九茹齋守節五十八歲至

本朝順治十年 詔旌其門

周氏儒士汪朝聘妻年十七生子之翽二十九夫亾守節
五十四歲卒朝聘侄大學生茂滋娶徐氏年十六夫亾無

子守節至五十歲

本朝順治己亥巡按張鳳起表其門爲雙節


朱氏上海人康朝紳之妻年十八于歸二十一而寡力勤訓子巡按張鳳起旌其門

裴氏華亭人明經裴大猷之女性至孝年未及笄母黃氏病危氏兩次割股療母終不告人年二十二適已卯乙榜陳或平半年夫歿氏頰頸流血願以身殉其母知有遺腹兩月告以後嗣為重因強食苟活後果得男良治茹茶飲冰堅貞苦守

本朝康熙三年撫院韓學使孫表其廬曰貞操孝行孝婦黃氏閩人僑居華亭林質彬妻也性至孝于康熙三年七月舅姑病篤醫禱罔效氏焚香祝天求以身代隨操


刀割股調羹親奉危病俱痊感動里隣庠生呈事

本朝康熙四年肆月學使孫批以孝德風世表揚其門




松江府志卷之四十八 終

文政重印



本府...
八...



廿二